



文獻通考卷之二百十四

宋鄱陽馬端臨貴與著

明蘄陽馮天馭貴與校刊

經籍考王子雜家

論衡三十卷

晁氏曰後漢王克仲任撰克好論說始如詭異終有實理以俗儒守文多失其真乃閉門潛思戶牖墻壁各置刀筆著論衡八十五篇釋物類同異正時俗嫌疑後蔡邕得之秘玩以為談助云世謂漢文章溫厚爾雅及其東也已衰觀此書與潛夫論風俗通義之類比西京諸書驟不及遠甚乃知世人之言不誣

高氏子略曰書八十五篇二十餘萬言其為言皆叙天證敷人事析物類道古今大略如仲舒玉杯繁露而其文詳

詳則禮義莫能覈而精辭莫能肅而括幾於蕪且雜矣漢承滅學之後文景武宣以來所以崇厲表章者非一日之力矣故學者向風承意日趨於大雅多聞之習凡所撰錄日益而歲有加至後漢盛矣往往規度如一律體裁如一家是足以雋美於一時而不足以準的於來世何則事之鮮純言之少擇也劉向新序說苑奇矣亦復少探索之功闕詮定之密其叙事有與史背者不一二書尚爾况他書乎袁崧後漢書云克作論衡中土未有傳者蔡邕入吳始見之以爲談助談助之言可以了此書矣客有難克書煩重者曰石多玉寡寡者爲珍龍少魚衆少者爲神乎克曰文衆可以勝寡矣人無一引吾百篇人無一字吾萬言爲可貴矣予所謂之精覈而少肅括者正此謂歟

陳氏曰克肅宗時人仕爲州從事治中初作此書北方初

未有得之者王朗嘗詣蔡伯喈搜求至隱處果得論衡捉取數卷將去伯喈曰惟我與爾共勿廣也然自今觀之亦未爲奇

仲長子昌言二卷

崇文總目晉傳漢仲長統撰按本傳統論說古今及時俗行事著論多昌言凡三十四篇十餘萬言隋唐書目十卷今所存十五篇分爲三卷餘皆亡

傳子五卷

崇文總目晉傳休欒撰集經史治國之說評斷得失各爲區例本傳載內外中篇凡四篇亡錄合一百四十篇今亡一百一十七

公侯政術十卷

崇文總目魯人初撰蓋魯人名初不著其姓未詳何代人

正訓十卷

崇文總目不著撰人名氏按唐志有正訓二十卷辛德源撰而此題云陸機撰又止十卷據隋以前書錄皆無陸機正訓之目晉史機傳亦不言嘗有此書而德源所著今世已亡疑是其遺書

抱朴子外篇十卷

晁氏曰晉葛稚川撰自號抱朴子博聞深洽江左絕倫著書甚富言黃白之事名曰內篇其餘外篇晉書內外通有一百一十六篇今世所傳者四十篇而已外篇頗言君臣理國用刑之道故附於雜家云

女誡一卷

陳氏曰漢曹世叔妻班昭撰固之妹也俗號女孝經

蔣子萬機論二卷

陳氏曰魏本尉平河蔣濟子通撰按館閣書目十卷五十五篇今惟十五篇疑非全書也

孫子十卷

陳氏曰趙晉孫綽與公撰恐依托唐志及中興書目並無之從程文簡家借錄

劉子五卷

陳氏曰劉晝孔昭撰播州錄事參軍袁孝政為序凡五十五篇按唐志十卷劉勰撰今序云晝傷已不遇天下陵遲播遷江表故作此書時人莫知謂為劉勰或曰劉歆劉孝標作孝政之言云爾終不知晝為何代人其書近出傳記無稱莫詳其始末不知何以知其名晝字孔昭也

金樓子十卷

晁氏曰唐袁政注言脩心治身之道而辭頗俗薄

晁氏曰梁元帝撰釋書十篇論歷古興亡之迹箴戒立言
志恠雜說自敘著書聚書通曰金樓子者在藩時自號
陳氏曰雜記古今聞見末一卷爲自序

瑞應圖十卷

陳氏曰不著名氏按唐志有孫柔之瑞應圖記熊理瑞應
圖譜各三卷顧野王符瑞圖十卷又祥瑞圖十卷今此書
名與孫熊同而卷數與顧合意其野王書也其間亦多援
孫氏以爲注中與書目有符瑞圖二卷定著爲野王又有
瑞應圖十卷稱不知作者載天地瑞應諸物以類分門今
書正耳未知果野王否又云或題王伯齡至李淑書目又
直以爲孫柔之矣又恐李氏書別一家也

子鈔三十卷

陳氏曰梁尚書左丞潁川庾仲容子仲撰所取諸子之書

百有五家其間頗有與今世見行書不同者而亡者多矣
意林三卷

晁氏曰唐馬總會元撰初梁庾仲容取諸家書術數雜記
凡一百七家抄其要語爲三十卷總以其繁略失中增損
成三軸前有戴叔倫楊伯存兩序

高氏子略曰子鈔百十有七家仲容所取或數句或一二
百言是有以契其意入其用而他人不可共享者也馬總
意林一遵庾目多者十餘句少者一二言比子鈔更爲取
之嚴錄之精且約也戴叔倫序其書曰上以防守教之失
中以補比事之缺下以佐屬文之緒有疏通廣博潔淨符
信之要無僻放拘刻譏蔽邪蕩之患亦足以發其機寫其
志矣孔子曰雖小道亦有可觀是於諸子未嘗廢也聖人
既遠承學易殊義向之少純言議之多詭則百氏之爲家

不能盡叶乎一亦理之所必然也當篇籍散缺人所未見之時而乃先識其名又得其語斯足以廣聞見助發揮何止嘗昂嚙啖雞蹠也陸機氏曰傾群言之瀝液漱六藝之芳潤唐韋展日月如合璧賦云獵英華是庶幾焉容齋洪氏隨筆曰唐世未知尊孟子故意林亦列其書而有差不同者如伊尹不以一介與人亦不取一介於人之類其它所引書如胡非子隨巢子纏子王孫子公孫尼子阮子王部姚信士緯殷興通語牟子周生烈子秦菁子梅子任奕子魏朗子唐滂子鄒子孫氏成敗志蔣子譙子鍾子張儼默記裴氏新書袁淮正書袁子正論蘇子陸子張顯析言子子顧子諸葛子陳子要言符子諸書今皆不傳於世亦有不知其名者

陳氏曰總後仕至大理評事嘗副裴晉公平淮者也

長短經十卷

晁氏曰唐趙蕤撰北夢瑣言云蕤梓州鹽亭人博學韜鈴長於經世夫婦俱有隱操不應辟召論王霸機權正變之術第十卷載陰謀家本缺今存者六十四篇

炙轂子雜語注解五卷

晁氏曰唐王叡撰二儀實錄古今注載事物之始樂府題解樂府所由起叡輯纂數家之言正誤補遺劉允併歸一篇

事始三卷

晁氏曰唐劉孝孫等撰太宗命諸王府官以事名類推原初始凡二十六門以敘始學諸生易大傳自始作八卦至網罟耒耨臼杵之微皆記其本起檀弓所述亦皆物之始也然則事始之書當係之儒今以其所取不一故附於雜

家

陳氏曰唐吳王諮議弘文館學士南陽劉存撰
理道要訣十卷

陳氏曰唐宰相杜佑君卿撰凡三十三篇皆設問答之辭
末二卷記古今異制蓋於通典中撮要以便人主觀覽
造化權輿六卷

陳氏曰唐豐王府法曹趙自勳撰天寶七年表上陸農師
著埤雅頗采用之其孫務觀兩嘗為跋余求之久不獲已
亥歲吳門天慶觀道藏中借錄

刊語二卷

陳氏曰唐國子祭酒李諳撰

資暇集三卷

陳氏曰唐李匡文濟翁撰

兼明書二卷

陳氏曰唐國子太學博士丘光庭撰

蘇氏演義二十卷

陳氏曰唐光啓進士武功蘇鶚德祥撰此數書者皆考究
書傳訂正名物辨證訛謬有益見聞尤梁谿以家藏本刻
之當塗

仲蒙子三卷

陳氏曰唐校書郎長樂林慎思虔中撰

致禮書十卷

晁氏曰唐朱朴撰乾寧中為國子毛詩博士論述時務五
十篇上之詞如近時策斷之類迂緩不切與馬周所建明
不啻霄壤矣昭宗善其言用太宗擢周故事拔為相徒以
益亂可歎也

兩同書兩卷

晁氏曰唐羅隱撰隱謂老子養生孔子訓世因本之著內外篇各五其曰兩同書者取兩者同出而異名之言也陳氏曰不著名氏中興書目云唐吳筠撰唐藝文志同但入小說類采孔老為內外十篇名祝融子兩同書祝融者謂鬻子為諸子之首也

崇文總目唐羅隱撰采孔老二書著為內外十篇以老子修身之說為內孔子治世之道為外會其旨而同元

宋齊丘化書六卷

晁氏曰偽唐宋齊丘子嵩撰張耒文潛嘗題其後云齊丘之意特大鼠之雄耳蓋不足道其為化書雖皆淺機小數亦微有以見於黃老之所謂道德其能成功有以也吾嘗論黃老之道德本於清淨無為遺去情累而其末多流而

為智術刑名何哉仁義生於恩恩生於人情聖人節情而不遺者也無情之至至於無親無親則忍矣此刑名之所以用也文章頗高簡有可喜者其言曰君子有奇志天下不親雖聖人出斯言不廢

格言五卷

晁氏曰偽唐韓熙載叔言撰熙載以經濟自任乃著書二十六篇論古今黃伯之道以干李煜首言陽九百六之數及五運迭興事其駢雜如此有門人舒雅序

中華古今注三卷

陳氏曰後唐太學博士馬縞撰蓋推廣崔豹之書也

續事始五卷

晁氏曰偽蜀馮鑑廣孝孫所著

事原錄三十卷

晁氏曰皇朝朱繪撰其書事始之類也
物異相感志十卷

晁氏曰皇朝僧贊寧撰采經籍傳記物類相感者志之分
天地人物四門贊寧吳人以博物稱於世柳如京徐騎省
與之游或就質疑事楊文公歐陽文忠公亦皆知其名
陳氏曰贊寧國初名釋也

耄智餘書三卷

陳氏曰太子少保致仕澶淵晁迥德遠撰迥善養生兼通
釋老書年至八十四子孫多聞人

昭德新編一卷

陳氏曰晁迥撰昭德者京師居第坊名也晁氏子孫皆以
為稱

宋景文筆錄三卷

晁氏曰皇朝宋祁撰皆故事異聞嘉言奧語可為談助不
知何人所編每章冠以公曰景文乃祁謚也

中興藝文志筆錄三卷皇朝紹聖中宋肇次其祖庠遺語
凡一百七十條

按二筆錄卷數同祁庠又兄弟也然則一書耶二書耶
當考

近事會元五卷

陳氏曰李上友撰自唐武德至周顯德雜事細務皆記之
微言三卷

陳氏曰司馬光手抄諸子書題其末曰余此書類舉人抄
書然舉子所鈔獵其辭余所鈔覈其意舉人志科名余志
道德其言書迂叟言六十八蓋公在相位時也方機務填
委且將屬疾而好學不厭克勤小物如此所鈔自國語而

下六書其目三百一十有二小楷端無一筆不謹百世之下使人肅然起敬真跡藏邵康節家其諸孫边守漢嘉從邵氏借刻携其板歸越今在其群從述尊古家泣歧書三卷

陳氏曰蜀人龍昌期撰稱上昭文相公有後序言求薦進之意

天保正名論八卷

陳氏曰龍昌期撰其學迂僻專非周公妄人也

事物紀原二十卷

陳氏曰不著名氏中興書目十卷開封高承撰元封中人凡二百七十事今此書多十卷且數百事是後人廣之耳

孔氏雜說記一卷

晁氏曰皇朝孔仲武撰論載籍中言前往行及國家故實

賢哲文章亦時記其所見聞著

晁氏客語一卷

陳氏曰晁說之以道撰

王氏雜說十卷

晁氏曰皇朝王安石介甫撰蔡京為安石傳其略曰自先王澤竭國異家殊由漢迄唐源流浸深宋興文物盛矣然不知道德性命之理安石奮乎百世之下追堯舜三代通乎晝夜陰陽所不能測而入於神初著雜說數萬言世謂其言與孟軻相上下於是天下之士始原道德之意窺性命之端云所謂雜說卽此書也以京之夸至如此且不知所謂通乎晝夜陰陽所不能測而入於神者為何等語故著之

汲世論一卷

晁氏曰右未詳何人所著多稱元祐間事且喜論兵疑呂氏書也凡十門

馭臣鑒古二十卷

晁氏曰右皇朝鄒館撰元豐中爲中丞獻之朝未幾坐操心頗僻賦性姦回論事薦人不循分守貶

廣川家學三十卷

陳氏曰中書舍人董弁公升撰述其父道文學

蘇文定公遺言

蘇轍子由撰周平原序略曰文定公晚居許昌造深矣避禍謝客縱有門人亦罕與言其間絕論者子孫而止耳然諸子宦游惟長孫將作監丞仲滋謹縮十有四才識卓然侍左右者九年記遺言百餘條未嘗增損一語既老以授其子郎中君詡郎中復以授其子道州史君森予嘗與

道州同僚故請題其後昔人疑黃樓賦非出公手東坡蓋親爲之辨今公自謂此賦學兩都晚年不復作此工夫之文至和陶擬古九首則明言坡代作識者當自得之又云讀書須學爲文餘事作詩然公詩自工謂儲光羲高處似陶淵明平處似王摩詰而以韓子蒼比之子蒼由是知名公素不作長短句今漁家傲一篇雖用禪語而句法極高乃知公非不能詞直不爲耳此皆學者所宜知也

石林家訓一卷

陳氏曰葉夢得少蘊撰

石林過庭錄二十七卷

陳氏曰葉夢得與諸子講說者其中子模編輯之

程氏廣訓六卷

陳氏曰中書舍人三衢程俱致道撰

藝苑雌黃二十卷

陳氏曰建安嚴有翼撰大抵辨正訛謬故曰雌黃其目子史傳注詩詞時序名數聲畫器用地理動植神怪雜事卷為二十條凡四百條硯岡居士唐稷序之有翼常分教泉荆二郡

湘素雜說十卷

晁氏曰皇朝黃朝英撰所記二百事朝英建州人紹聖後舉子也為王安石之學者以贈之以為藥為男淫女貽我握椒為女淫男鄙褻不與前輩嘗以是為嗤笑朝英特愛重之以為得詩人深意其他可知矣

陳氏曰陳與者為之序言甲辰六試吏部不利蓋政宣中士子也其書亦辨正名物而學頗近僻

程氏演繁露曰此書辨正世傳名物音義多有歸宿而時

有闕疑者至釋宋子京以麥詩以四月為麥秋而曰按北史蘇綽傳麥秋在野其石遠矣是未嘗讀月令也以此知

博記之難

聖賢眼目一卷

陳氏曰曲阿洪興祖慶善撰摘取經子數十條以已見發明之

義林一卷

陳氏曰眉山程敦厚子山撰其上世東坡外家也子山為人凶險附秦檜至右史後坐謫死

演繁露十四卷續十卷

陳氏曰程大昌泰之撰初在館中見蕃露書以為非說見春秋類又引古今注冕旒綴玉下重如繁露然蓋與玉杯竹林同為托物名篇可想見也今日演繁露者意古之蕃

露與爾雅釋名廣雅刊誤正俗之類云耳

考古編十卷續編十卷

陳氏曰程大昌撰上自詩書下及史傳世俗雜事有可攷見者皆筆之

楚澤叢語八卷

陳氏曰右迪功郎李善言光撰不知何人作其書專關孟子紹興中撰進大意以爲王氏之學出於孟子然王氏信有罪矣孟氏何與焉此論殆得於景迂之微意

容齋隨筆續筆三筆四筆各十六卷五筆十卷

陳氏曰翰林學士番陽洪邁景虛撰每編皆有小序五筆未成書

朱子語錄曰洪景虛隨筆中辨得數種僞書皆是但首卷載歐帖事却非實世間僞書如西京雜記顏師古已辨之

矣

續顏氏家訓八卷

陳氏曰左朝請大夫李正公撰皆用顏氏篇目而增廣之習學記言五十卷

陳氏曰閣學士龍泉葉適正則撰自六經諸史子以及文鑑皆有論說大抵務爲新奇無所蹈襲其文刻峭精工而義理未得爲純明正大也自孔子之外古今百家隨其淺深咸有遺論無得免者而獨於近世所傳子華子篤信推崇之以爲真與孔子同時可與六經並考而不悟其爲僞也且旣曰其書甚古而文與今人相近則亦知之矣遠自七略及隋唐國史諸志李邕鄴諸家書目皆未之有豈不足以及驗其非古出於近世好事能文者之所爲而反謂孟荀以來無道之者蓋望而棄之也不亦惑乎

準齋雜說一卷

陳氏曰錢唐吳如愚撰

灌畦暇語一卷

陳氏曰不知作者雜取史傳事略述已意

忘筌書二卷

陳氏曰潘植子醇撰新安所刻本凡八十二篇與館閣書目諸儒鳴道集及余家寫本篇數皆不同本已見儒家而館目置之雜家者以其多用釋老之說故也今亦別錄於此

袁氏世範三卷

陳氏曰樂清令三衢袁采君載撰

文獻通考卷之二百十四

文獻通考卷之二百十五

宋鄱陽馬端臨貴與著

明蘄陽馮天馭應房校刊

經籍考子小說家

燕丹子三卷

中興藝文志丹燕王喜太子此書載丹與荆軻事

周氏涉筆曰荆軻事既卓俛傳記所載亦甚掘奇今燕丹

子三篇與史記皆相合似是史記事本也然烏頭白馬生

角機橋不發史記以怪誕削之進金擲壺膾千里馬肝截

美人手史記以過當削之聽琴姬得隱語史記以徵所聞

削之史遷不獨文字雄深至於識見高明超出戰國以後

其書及削百家誣謬亦豈可勝計哉今世祇謂太史公多

好亦未然也又如許由伊尹范蠡亦多疑辭惟信孔氏門

人傳錄大過如五帝本紀孔子世家其間秕妄居多是未能充其類

神異經一卷

陳氏曰稱東方朔撰張茂先傳

十洲記一卷

晁氏曰漢東方朔撰班固贊言朔之談諧逢占射覆其事浮淺童兒牧豎莫不眩耀而後世好事者因取奇言怪語附著之朔豈謂此書之類乎

陳氏曰亦稱東方朔撰二書詭誕不經皆假托也漢書本傳叙朔之辭末言劉向所錄朔書具是矣世所傳他事皆非也贊又言朔之談諧其事浮淺行於衆庶而後世好事者因取奇言怪語附著之朔故詳錄焉史家欲祛妄惑可謂明矣

洞冥記四卷拾遺一卷

晁氏曰後漢郭憲子橫撰其序言漢武明雋特異之主東方朔因滑稽浮誕以匡諫洞心於道教使冥跡之奧昭然顯著故曰洞冥

陳氏曰題漢武別國洞冥記其別錄又於御覽中抄出然則四卷亦非全書也凡若是者藏書之家備名數而已無之不足爲損有之不足爲益况於詳略尤非所計也唐志入神僊家

周盧注博物志十卷 盧氏注六卷

殷文奎啓注晉張華讀三十車書作博物志四百武帝以爲繁只作十卷

晁氏曰晉張華撰載歷代四方奇物異事兩本前六卷略同無周氏注者稍多而無後四卷周名日用西京賦曰小

說九百起自虞初周人也其小說之來尚矣然不過志夢卜紀譎怪記談諧之類而已其後史臣務采異聞往往取之故近時爲小說者始多及人之善惡甚者肆喜怒之私變是非之實以誤後世至于譽相溫而毀陶侃褒盧杞而貶陸贄者有之今以志怪者爲上褒貶者爲下云

王子年拾遺記十卷

晁氏曰梁蕭綺叙錄晉王嘉字子年嘗著書百二十篇載伏羲以來異事前世奇詭之說書逸不完綺綴拾殘缺而叙之

名山記一卷

陳氏曰亦稱王子年卽前之第十卷大抵皆詭誕嘉符秦

時人見晉書藝術傳

世說新語十卷重編世說十卷

晁氏曰宋劉義慶撰梁劉孝標注東漢以後事分三十八門唐藝文志云劉義慶世說八卷劉孝標續十卷而崇文總目止載十卷當是孝標續義慶元本八卷通成十卷耳家本有二一極詳一殊略略有稱改正未知誰氏所定然其目則同劉知幾頗言此書非實錄予亦云

陳氏曰今本三卷叙錄二卷叙錄者近世學士新安汪藻彥章所爲也首爲考異繼列人物世譜姓字異同末記所引書目按唐志作八卷劉孝標續十卷自餘諸家所藏卷第多不同叙錄詳之此本董令升刻之嚴州以爲晏元獻公手自校定刪去重複者

高氏緯略曰義慶采擷漢晉以來佳事佳話爲世說新語

極爲精絕而猶未爲奇也梁劉孝標注此書引援詳確有
不言之妙如引漢魏吳諸史及子傳地理之書皆不必言
只如晉氏一朝史及晉諸公別傳譜錄文章凡一百六十
六家皆出於正史之外紀載特詳聞見未接寔爲注書之
法

殷芸小說十卷

晁氏曰宋殷芸撰述秦漢以來雜事予家本題曰劉餗李
淑以爲非

陳氏曰邯鄲書目云或題劉餗非也今此書首題秦漢魏
晉宋諸帝注云齊殷芸撰非劉餗明矣故其叙事止宋初
蓋於諸史傳記中抄集或稱商芸者宣祖廟未祧時避諱
也

述異記二卷

晁氏曰梁任昉撰昉家藏書三萬卷天監中采輯前世之
事纂新述異皆時所未聞將以資後來屬文之用亦博物
之意唐志以爲祖同所作誤也

續齊諧記二卷

陳氏曰梁奉朝請吳均撰齊諧志怪本莊子語也唐志又
有東陽無疑齊諧志今不傳此書殆續之者歟

北齊還冤志二卷

陳氏曰顏之推撰

古今同姓名錄一卷

陳氏曰梁元帝撰有陸善經者續之至五代時

隋唐嘉話一卷 劉餗小說三卷

陳氏曰並唐右補闕劉餗鼎卿撰

博異志一卷

晁氏曰題曰谷神子纂序稱其書頗歲規時事故隱姓名或曰名還古而竟不知其姓志怪之書也

陳氏日記唐初及中世事

卓異記一卷

晁氏曰唐李翱撰或題云陳翱開成中在襄陽記唐室君臣功業殊異者二十七類

陳氏日記當時君臣卓絕盛事

集異記二卷

晁氏曰唐薛用弱撰集隋唐間談詭之事一題古異記首載徐佐卿化鶴事

陸氏集異記二卷

晁氏曰唐陸勳纂語怪之書也凡三十二事言大怪者居三之一

稽神異苑十卷

晁氏曰題云南齊焦度撰雜編傳記鬼神變化及草木禽獸妖怪譎詭事按焦度南安人也質訥朴慙以勇力事高帝決不能著書又卒於建元四年而所紀有梁天監中事必非也唐志有焦露窮神秘苑十卷豈卽此書而相傳之訛歟

朝野僉載補遺三卷

晁氏曰唐張鷟文成撰分三十五門載唐朝雜事鷟自號浮休子蓋取莊子其生也浮其死也休之義容齋洪氏曰僉載紀事皆瑣尾擿裂且多媒語

陳氏曰其書本三十卷此特其節略耳別求之未獲

冥報記二卷

陳氏曰唐吏部尚書京兆唐臨本德撰

辨疑志三卷

陳氏曰唐宣武行軍司馬吳郡陸長源撰辨俚俗流傳之妄

宣室志十卷

晁氏曰唐張讀聖明撰纂輯僊鬼靈異事名曰宣室志者取漢文召見賈生論鬼神之義苗台符為之序

封氏見聞記五卷

晁氏曰唐封演撰分門記儒道經籍人物地理雜事且辨說訛謬蓋著其所見聞如此

陳氏曰前紀典故末及雜事頗有可觀

劉公嘉話一卷

晁氏曰唐韋絢撰劉公謂禹錫絢字文明執誼子也咸通中節度義武幼從學於禹錫錄其語言

戎幙閑談一卷

晁氏曰唐韋詢撰太和中為李德裕從事記德裕所談

平泉草木記一卷

晁氏曰唐李德裕撰記其別墅奇花異草樹石名品仍以歎詠其美者詩二十餘篇附于後平泉即別墅姓名

玄怪錄十卷

晁氏曰唐牛僧孺撰僧孺為宰相有聞于世而著此等書周秦行紀之謗蓋有以致之也

陳氏曰唐志十卷又言李復言續錄五卷館閣書目同今

但有十一卷而無續錄

續玄怪錄十卷

晁氏曰李復言續僧孺書分仙術感應三門

周秦行紀一卷

晁氏曰李復言續僧孺書分仙術感應三門

晁氏曰唐牛僧孺自叙所遇異事實黃中以為韋瓘所撰
瓘李德裕門人以此誣僧孺

洽聞記三卷

晁氏曰唐鄭常撰記古今神異詭譎事凡百五十六條或
題曰鄭遂

甘澤謠一卷

晁氏曰唐袁郊撰載譎異事九章咸通中久雨卧疾所著
故曰甘澤謠

陳氏曰咸通戊子自序以其春雨澤應故有甘澤成謠之
語以名其書

河東記三卷

晁氏曰唐薛漁思撰亦記譎怪事序云續牛僧孺之書
酉陽雜俎二十卷續酉陽雜俎十卷

晁氏曰唐段成式撰自序云縫掖之徒及怪及戲無侵於
儒詩書為大美史為折俎子為醯醢大小二酉山多藏奇
書故名篇曰酉陽雜俎分三十門為二十卷其後續十卷
陳氏曰所記固多譎怪其標目亦奇詭如天咫玉格壺史
具編尸窆之類成式文昌之子

因話錄六卷

晁氏曰唐趙璘撰字澤章大中時為衢州刺史記唐史逸
事

劇談錄三卷

晁氏曰康駢字駕言撰乾符中登進士第書成載唐世故
事

唐語林十卷

晁氏曰未詳撰人效世說體分門記唐世名言新增嗜好

等十七門餘皆仍舊

史話三卷

晁氏曰不題撰人自後漢及江左朝野雜事皆記之

資暇三卷

晁氏曰唐李匡義濟翁撰序稱世俗之談類多訛誤雖有見聞嘿不敢證故著此書上篇正誤中篇譚原下篇本物以資休暇云

芝田錄一卷

晁氏曰叙謂嘗憇緱氏故取潘岳西征賦名其書記隋唐雜事未詳何人摠六百條

朝廷卓絕事一卷

晁氏曰唐陳峒撰記唐朝忠賢卓絕五十事

杜陽雜編三卷

晁氏曰唐蘇鶚字德祥撰光啓中進士家武功杜陽川雜錄廣德以至咸通時事

雲溪友議三卷

晁氏曰唐范攄撰記開元以後事攄五溪人故以名其書陳氏曰咸通時人唐志三卷今本十二卷

談賓錄十卷

晁氏曰唐朝璩子溫撰皆唐朝史之所遺文武間人

乾膳子三卷

晁氏曰唐溫庭筠撰序謂語怪以悅賓無異膳味之適口故以乾膳名書

陳氏曰叙言不爵不觥非魚非彘能悅諸心聊甘衆口庶乎乾膳之義膳與饌同字從肉見古禮經

尚書故實一卷

是氏曰唐李綽編崇文摠目謂尚書即張延賞也綽記延賞所談故又題曰尚書談錄按其書稱嘉貞為四世祖疑非延賞也

陳氏曰其書首言賓護尚書河東張公三代相門謂嘉貞延賞弘靖弘靖盧龍失御貶賓客分司綽唐末人未必及弘靖弘靖之後文規次宗彥遠皆不登八座未詳所謂唐志即以為延賞尤不然

家學要錄一卷

是氏曰唐柳珪采其曾祖彥昭祖芳父冕家集所記累朝典章因革時政得失著此錄小說之尤者也

常侍言指一卷

是氏曰唐柳珪記其世父芳所著凡十六章末有劉出求及上清傳附

異聞集十卷

是氏曰唐陳翰編以傳記所載唐朝奇怪事類為一書陳氏曰唐末人見唐志而第七卷所載王魁乃本朝事當是後人勦入之耳

聞奇錄一卷

陳氏曰不著名氏當是唐末人

松窓錄一卷

是氏曰唐韋叡撰記唐朝故事

瀟湘錄十卷

陳氏曰校書郎李隱撰館閣書目云耳唐志作柳詳未知書目何據也

幽閑鼓吹一卷

是氏曰唐張固撰紀唐史遺書二十五篇懿僖間人

知命錄一卷

陳氏曰唐劉愿撰凡二十事

前定錄一卷

陳氏曰唐崇文館校書鍾輅撰凡二十二事別本又有續錄二十四事

雜纂一卷

陳氏曰唐李商隱義山撰俚俗常談鄙事可資戲笑以類相從今世所稱殺風景蓋出於此又有別本稍多皆後人附益

巽岩李氏曰用諸酒杯流行之際可謂善謔其言雖不雅馴然所訶諷多中俗病聞者或足以為戒不但為笑也

盧氏雜說一卷

陳氏曰唐盧言撰

廬陵官下記二卷

陳氏曰段成式撰為吉州刺史時

唐缺史三卷

陳氏曰唐高彦休撰自號參寥子乾符中人

北里志一卷

晁氏曰唐孫棨撰記大中進士游俠平章事孫光憲言棨之意在譏盧相樵也蓋樵之女與其甥通樵知之遂以妻之殺家人以滅口云

玉泉筆端三卷 又別一卷

陳氏曰不著名氏有序中和三年作末有跋云扶風李昭德家藏之書也即故淮海相公孫又稱黃巢陷洛之明年跋亦不知何人別一本號玉泉子此本少數條而多五十二條無序跋錄其所多者為一卷

三水小牘三卷

陳氏曰唐皇甫牧遵美撰天祐中人三水者安定屬邑也
醉鄉日月三卷

陳氏曰唐皇甫松子奇撰唐人飲酒令此書詳載然今人
皆不能曉也

龍城錄一卷

陳氏曰稱柳宗元撰龍城謂柳州也羅浮梅花夢事出其
中唐志無此書蓋依托也或云王銍性之作

朱子語錄曰柳文後龍城錄雜記王銍之為也子厚敘事
文字多少筆力此記衰弱之甚皆寓古人詩文中不可曉
知底於其中似暗影出

唐朝新纂三卷

陳氏曰融州副史石文德撰

豪異秘纂一卷

陳氏曰無名氏所錄五事其扶錄國王一則所謂虬須客
者也

樹萱錄一卷

陳氏曰不著名氏序稱纂尚書滎陽公所談者亦不知何
人又云普聖園丘之明年普聖者僖宗由普王踐位也書
雖見唐志今亦未必本真或云劉燾無言所為也

續樹萱錄一卷

容齋洪氏隨筆曰頃在秘閣抄書得續樹萱錄一卷其中
載隱君子元撰夜見吳王夫差與唐諸詩人吟詠事李翰
林詩曰芙蓉露濃紅壓枝幽禽感秋花畔啼玉人一去未
回馬梁間燕子三見歸張司業曰綠頭鴨兒匝萍藻採蓮
女郎笑花老杜舍人曰鼓鼙夜戰北窻風霜葉沿階貼亂

紅三人皆全篇杜工部曰紫領寬袍漉酒巾江頭蕭散作
閑人白少傅曰不因霜葉辭林去的當山翁未覺秋李賀
曰魚鱗甃空排嫩碧露桂梢寒掛團壁三人皆未終篇細
味其體格語句往往逼真後閱秦少游集有秋興九首皆
擬唐人前所載咸在焉關子東為秦集序云擬古數篇曲
盡唐人之體正謂是也何子楚云續瑩錄乃王性之所作
而托名他人今其書才有三事其一曰賈博論一曰全若
虛一曰元撰詳命名之義蓋取諸子虛亡是公云
雲僊散錄一卷

陳氏曰稱唐金城馮贄撰天復元年叙馮贄者不知何人
自言取家世所蓄異書撮其異說而所引書名皆古今所
不聞且其記事造語如出一手政如世俗所行東坡杜詩
注之類然則所謂馮贄者及其所蓄書皆子虛烏有也亦
可謂枉用其心者矣

洪氏容齋隨筆曰俗間所傳淺妄之書如所謂雲僊散錄
老杜事實之類皆絕可笑然士大夫或信之孔傳續六帖
采摭唐事殊有工而悉載雲僊錄中事自穢其書近世南
劍州學刊散錄可毀

文獻通考卷之二百十六

宋鄱陽 馮端臨 貴與 著
明節陽 馮天馭 應房 校刊

經籍考 子 小試

傳奇三卷

晁氏曰唐裴鉞撰唐志稱鉞高駢客故其書所記皆神仙
恢譎事駢之惑呂用之未必非鉞輩導說所致

陳氏曰尹師魯初見范文正岳陽樓記曰傳奇體耳然文
體隨時理勝為貴文正豈可與傳奇同日語哉蓋一時戲
笑之談耳唐志三卷今六卷皆後人以其卷帙多而分之
也

摭言十五卷

晁氏曰唐王定保撰分六十三門記唐朝進士應舉登科

卷之六 文獻通考卷之二百十六 卷之六

雜事

陳氏曰定保光化三年進士為吳融子華婿喪亂後入湖南棄其妻弗顧士論不齒

金華子三卷

晁氏曰唐劉崇遠撰金華子其自號蓋慕皇初平為人也錄唐大中後事一本題曰劉氏雜編

陳氏曰崇遠五代時人仕至大理司直

北夢瑣言二十卷

晁氏曰荆南孫光憲撰光憲蜀人從楊玘元澄遊多聞唐世賢哲言行因纂輯之且附以五代十國事取傳由於江南之夢自以為高氏從事在荆南之北故命編云

陳氏曰光憲仕荆南高從誨為黃州刺史三世在幙府後隨繼冲入朝有薦於太祖者將用為學士未及而卒光憲

自號葆光子

皮氏見聞錄五卷

晁氏曰五代皮光業撰唐末為餘杭從事記當時詭異見聞自唐乾符四年迄晉天福二年自號鹿門子

耳目記一卷

陳氏曰無名氏邯鄲書目云劉氏撰未詳其名記唐末以後事

紀聞談三卷

陳氏曰蜀潘遠撰節閣書目按李淑作潘遠今考邯鄲書目亦作潘遠其曰遺者本誤也所記隋唐遺事

鑑戒錄十卷

晁氏曰後蜀何光遠撰字輝夫東海人唐證中纂輯唐以來君臣事迹可為世鑒者前有劉曦度序李獻臣云不知

何時人考之不誤也

葆光錄三卷

陳氏曰陳纂撰自號襲明子所載多吳越事當是國初人後史補三卷

陳氏曰前進士高欲拙撰

野人閑話五卷

陳氏曰成都景煥撰記孟蜀時事乾德三年序

續野人閑話二卷

陳氏曰不知作者

稽神錄六卷

晁氏曰南唐徐鉉撰記怪神之事序稱自乙未歲至乙卯凡二十年僅得百五十五事揚大年云江東布衣蒯亮好大言夸誕鉉喜之始叩于門下稽神錄中事多亮所言

陳氏曰元本十卷今無卷第摠作一卷當自是他書中錄出者

賈氏談錄一卷

晁氏曰南唐張洎奉使來朝錄賈黃中所談二十餘事歸獻其主

燈下閑談二卷

陳氏曰不知作者

啓顏錄八卷

陳氏曰不知作者雜記恢諧調笑事唐志有侯白啓顏錄十卷未必是此書然亦多有侯白語但訛謬極多

開顏集三卷

陳氏曰校書郎周文規撰未知何時人以古笑林多猥俗乃於書史中抄出可資談笑者爲此篇

唐摭言十五卷

陳氏曰鄉貢進士何晦撰其序言太歲癸酉下第於金陵鳳臺旅舍癸酉者開寶六年也時江南獨未下晦蓋其國人歟

洛陽搢紳舊聞記十卷

陳氏曰丞相曹國張齊賢師亮撰所錄張全義治洛事甚詳

太平廣記五百卷

晁氏曰皇朝太平興國初詔李昉等取古今小說編纂成書同太平御覽上之賜名廣記

夾漈鄭氏曰太平廣記乃太平御覽中別出廣記一書專記異事

鹿革事類三十卷鹿革文類三十卷

晁氏曰節太平廣記事實成一編曰事類詩文成一編曰文類蔡蕃晉如所撰晉如博學通書音律能屬文與十父相友善

洛中記異十卷

晁氏曰皇朝秦再思記五代及國初識應雜事

洞微志十卷

晁氏曰皇朝錢希白述記唐以來詭譎事

清異錄二卷

陳氏曰稱翰林學士陶穀撰凡天文地理花木飲食器物每事皆制為異名新說其為書殆似雲仙散錄而語不類國初人蓋假托也

乘異記三卷

晁氏曰皇朝張君房撰其序謂乘者載記之名異者非常

之事蓋志鬼神變恠之書凡十一門七十五事

陳氏曰咸平癸卯序取晉之乘之義也君房又有脞說家偶無之晁公武讀書志以脞說爲張唐英君房撰又言君房著名臣撰蜀檮杌雲笈七籤行于世按君房祥符天禧以前人楊大年改閑忙今所謂紫微失却張君房者卽其人也嘗爲御史屬坐鞠獄貶秩因編修七籤得著作佐郎七籤序自言君房蓋其名非字也唐英字次功熙豐間人丞相商英天覺之兄作名臣傳蜀檮杌者與君房了不相涉不知晁何以合爲一人也其誤明矣

括異記十卷

晁氏曰皇朝張師正撰師正擢甲科得太常博士後游宦四十年不得志於是推變恠之理參見聞之異得二百五十篇魏泰爲之叙

祖異志十卷

晁氏曰皇朝聶田撰田天禧中進士不中第至元祐初因記近時詭聞異見一百餘事天禧至元祐七十餘年田且百歲矣康定元年序

楊文公談苑八卷

晁氏曰皇朝宋庠編初楊公億里人黃鑑哀撰平生異聞爲一編庠取而刪類之分爲二十一門

陳氏曰鑑書初名南陽談數宋公刪其重複改曰談苑

歸田錄十卷

晁氏曰皇朝李旼蜀人張詠客也與范鎮友善熙寧中致仕歸與門人宿客燕談忘倦門人請編錄之又名該聞錄書目解題作十卷又有雜詩十二篇係于後

江鄰幾雜志三卷

晁氏曰皇朝江休復撰休復歐陽永叔之執友其所紀精博絕人遠甚鄰幾其字也又名嘉祐雜志
開談錄兩卷

晁氏曰皇朝蘇耆撰舜卿之父也記五代以來雜事下秩多載馮道行義

文會談叢一卷

陳氏曰題華陽上官融撰不知何人天聖五年序

國老閑談二卷

陳氏曰稱夷門君王撰不著姓

東齋記十卷

晁氏曰皇朝范鎮景仁撰元豐中序言既謝事日於東齋燕坐追憶在朝時交游言語與夫俚俗傳記因纂集成一篇崇觀間以其及國朝故事禁之

春秋退朝錄三卷

晁氏曰皇朝宋敏求次道撰多記國朝典故其序云熙寧三年予奉朝請于春明里因纂所聞也

南遷錄二卷

晁氏曰皇朝張舜臣芸叟撰舜民元豐中從軍攻靈州師還謫授柳州監酒卽日之官記塗中所歷并其詩文

夢溪筆談二十六卷

晁氏曰皇朝沈括存中撰括好功名城未樂不克貶死而實才高博學多技能音律星曆尤邃自序云退處林下深居絕過從所與談者惟筆硯而已故以名其書凡十七目

忘懷錄三卷

晁氏曰皇朝元豐中夢上文人撰所集皆飲食器用之式種藝之方可以資山居之樂者或云沈括也

陳氏曰括坐未樂事閑廢晚歲乃以光祿卿分司卜居京口之夢溪有水竹山林之適少有懷山錄可資居山之樂者輒記之自謂今可忘于懷矣故易名忘懷錄

郡閣雅言一卷

晁氏曰皇朝潘若同撰太宗時守郡與僚佐話及南唐野逸賢哲異事佳言輒疏之于書凡五十六條以資雅言或題曰郡閣雅談書錄解題作郡閣雜言題贊善大夫潘欲

冲撰

秘閣閑談五卷

晁氏曰皇朝吳淑撰記秘閣同僚燕談淑仕南唐後隨李煜降丹陽人

牧豎閑談三卷

晁氏曰皇朝景漁纂十九事于景漁蜀人也

幙府燕閒錄十卷

晁氏曰皇朝畢仲詢撰仲詢元豐初嵐州推官纂當代怪奇可喜之事爲二十門

歸田錄二卷

陳氏曰歐陽修撰或言公爲此錄未傳而序先出裕陵索之其中本載時事及所經歷見聞不敢以進旋爲此本而初本竟不復出未知信否公自爲序略曰歸田錄者朝廷之遺事史官之所不記與夫士大夫笑談之餘而可錄者錄之以備閑居之覽也又曰唐李肇國史補序云言報應叙鬼神述夢卜近帷箔悉去之記事實探物理辨疑惑示勸戒采風俗助談笑則書之余之所錄大抵以肇爲法而小異於肇者不書人之過惡以謂職非史官而掩惡揚善君子之志也覽者詳之

歸田後錄十卷

陳氏曰朝請郎廬江朱定國與仲撰熙豐間人竊取歐公舊錄之名實不相關也

清夜錄一卷

陳氏曰沈括撰

續清夜錄一卷

陳氏曰王銍性之撰

苔川子所記三事一卷

陳氏曰不知何人三事者勃率姑王立林果毅皆異事也末有韓蟲兒一事是歐陽公所記偶錄附此

補姤記一卷

晁氏曰古有姤記久而亡之不知何人輯傳記中婦人嚴姤事以補亡

陳氏曰稱京兆王績編不知何時人古有宋虞之姤記等今不傳故補之自商周而下迄五代史傳所有姤婦皆載之未及神恠雜說文論等最後有治姤二方尤可笑也

茅屋客話十卷

晁氏曰皇朝黃休復撰茅亭其所居也暇日賓客語言及虛無變化謠俗卜筮雖異端而合道旨屬懲勸者皆錄之陳氏曰其所記多蜀事別有成都名畫記蓋蜀人也

褒善錄一卷

晁氏曰皇朝王蕃撰嘉祐中巴縣簿黃靖國死而復蘇道其真中所見廖生嘗傳之蕃刪取其要為此書

吉凶影響錄十卷

晁氏曰皇朝岑象求編象求熙寧末間居江陵披閱載籍見善惡報應事輒刪潤而記之間有聞見者難乎備載亦

采摘著于篇

勸善錄六卷

晁氏曰皇朝周明寂元豐中纂道釋神奇禍福之效前人
為傳記者成一編以戒世

勸善錄拾遺十五卷

晁氏曰不題撰人疑亦明寂所纂僅百事

鷄跖集十卷

晁氏曰未詳撰人所集書傳中瑣碎佳事分明編次之准
南子曰善學者如齊王食鷄必食其跖名書之意殆以此
三百家事類六十卷

晁氏曰分門編古今稗官小說成一書雖曰該博但失於
太略不題撰人

漁樵閑語二卷

晁氏曰設漁樵問答及史傳雜事不知何人所為

青瑣高議十八卷

晁氏曰不題撰人載皇朝雜事及名士所撰記傳然其所
書辭意頗鄙淺

悅神集一卷

晁氏曰不題撰人記滑稽之說唐有邯鄲淳笑林此其類
也

廣卓異記二十卷

陳氏曰樂史子正撰

王原叔談錄一卷

陳氏曰翰林學士南京王洙之子錄其父所言

湘山野錄三卷續三卷

晁氏曰皇朝熙寧中吳僧文瑩撰記國朝故事

玉壺清話十卷

晁氏曰皇朝僧文瑩元豐中撰自序云瑩收國初至熙寧中文集數千卷其間神道墓誌行狀實錄奏議之類輯其事成一家言玉壺者其隱居之潭也

延漏錄一卷

陳氏曰不著名氏其間稱伯父鄆公知其為章得象之姪也後題此書疑章望之作然未敢必望之者字表民用鄆公廢入官歐陽公為作字說者也以宰相嫌遂不仕錄中又記皇祐中與滕元發同試南廟滕首冠而已被黜籍令非望之亦當時場屋有聲者章氏雋才固多也

紀聞一卷

陳氏曰集賢殿修撰李復圭審言撰淑之子也

東坡手澤三卷

陳氏曰今俗本大全集中所謂志林者也

艾子一卷

陳氏曰相傳為東坡作未必然也

龍川略志六卷龍川別志四卷

晁氏曰皇朝蘇轍撰轍元符二年夏居循州杜門閉目追惟平昔使其子遠書之于紙凡四十事其秋復記四十七事龍川循州地名

古今前定錄二卷

晁氏曰皇朝尹國均輯經史子集古今之人興衰窮達貴賤貧富死生壽夭與夫一動靜一語默一飲一啄定於前而形于夢兆於卜見於相貌應於讖記者凡一門以為不知命而躁競者之戒至若裴度以陰德而致貴孫亮以陰譴而減齡之類又別為二門使君子不以天廢人云

澠水燕談十卷

晁氏曰皇朝王闢紹聖間撰澠水其退居之地也闢從仕四方與賢士大夫燕談有可取者輒記之久而得三百六十餘事

陳氏曰澠齊水名左傳有酒如澠闢治平四年進士

逆旅集

淮海秦觀撰自序曰余閑居有所聞輒書記之既盈編軸因次爲若干卷題曰逆旅集蓋以其智愚好醜無所不存彼皆隨至隨往適相遇於一時竟亦不能久其留也或曰吾聞君子言欲純事書欲純理詳於誌常而略於紀異今子所集雖有先王之餘論周孔之遺言而浮屠老子卜醫夢幻神仙鬼佛之說猥雜於其間是否莫之分也信誕莫之質也常者不加詳而異者不加略也無乃與所謂君子

之書言者異乎余笑之曰鳥栖不擇山林惟其木而已魚遊不擇江河惟其水而已彼計事而處縮而物而言切切然去彼取此者縉紳先生之事也僕野人也擁腫是師憐念是習仰不知雅言之可愛俯不知俗論之可卑偶有所聞則隨而記之耳又安知其純與駁邪然觀今世謂其言是則矍然改容謂其言信則適然以喜而終身未嘗信也則又安知彼之純不爲駁而吾之駁不爲純乎且萬物歷歷同歸一隙衆言喧喧同歸一源吾方與之沉與之游欲有取舍而不可得何暇是否信誕之擇哉子往矣客去遂以爲序

傅公嘉話一卷

晁氏曰皇朝傅堯俞之子孫記堯俞之言行凡四十餘章獻簡堯俞謚也

曾公南遊記一卷

晁氏曰曾公未詳何人當是公亮之孫也共十二章記國朝雜事

摺紳說二十卷

晁氏曰皇朝張唐英君房撰君房博學通釋老善著書如名臣傳蜀檮杌雲笈七籤行于世者毋慮數百卷此書亦詳實

稗官志一卷

晁氏曰皇朝呂大辨雜記其所聞前言往行

倦游雜錄八卷

晁氏曰右皇朝元豐初張師正撰序言倦遊云者仕不得志聊書平生見聞將以信于世也自以非史官雖書善惡而不敢褒貶

東軒筆錄十五卷續錄一卷

晁氏曰右皇朝魏泰撰襄陽人曾布之婦弟為人無行而有口頗為鄉里患苦元祐中紀其少時公卿間所聞成此編其所是非多不可信心喜章惇數稱其長則大槩已可見又多妄誕姑舉其一如謂王沂公登甲科劉子儀為翰林學士嘗戲之按沂公登科雖在子儀後四年其入翰林沂公反在子儀前七年沂公咸平五年登科子儀天禧三年始除學士蓋相去二十年其謬至此

王氏曰魏泰者場屋不得志喜偽作它人著書如志恠集括異志倦游錄盡假名武人張師正又不能自抑出其姓名作東軒筆錄皆用私喜怒誣讒前人最後作碧雲駉假作梅堯臣毀及范仲淹而天下駭然不服矣詳見碧雲駉條下

文獻通考卷之二百十七

文獻通考卷之二百十七

宋鄱陽 馬端臨 貴與 著

明蘄陽 馮天馭 應房 校刊

經籍考 子小說家

師友談記一卷

晁氏曰皇朝李鷹方叔撰多記蘇子瞻范純夫及四學士所談論故曰師友

青箱雜記十卷

晁氏曰皇朝吳處厚撰處厚發蔡確車蓋亭詩所記多失實成都置交子務起於寇瑊處厚乃以為張詠它多類此冷齋夜話六卷

晁氏曰皇朝僧惠洪撰多記蘇黃事皆依託也江淹擬陶淵明詩其詞浮淺洪既誤以為真淵明語且云東坡嘗稱

其至到鬼谷子書世所共見而云有崖蜜櫻桃也之言東坡橄欖詩已輸崖蜜十分甜蓋用之如此類甚多不可舉

陳氏曰未詳何人撰記國初至熙寧中雜事
遯齋閑覽十四卷 劔溪野語三卷

晁氏曰皇朝程正敏崇觀間撰正敏自號遯翁錄其平昔所見聞分十門爲小說一編以備異日披閱

張芸叟雜說一卷 畫墁集一卷

陳氏曰並吏部侍郎張舜民芸叟撰

洛游 一卷

陳氏曰題司馬光非也所稱樂全子齊物子亦莫知何人
塵史三卷

陳氏曰司農少卿安陸王得臣彥輔撰嘉祐四年進士其

序稱政和乙未行年八十自號鳳臺子蓋王昭素之後至
銍性之之伯也揮塵錄誤載

蘇氏談訓十卷

陳氏曰朝請大夫蘇象先撰述其祖魏公頌子容遺訓

續世說十二卷

陳氏曰孔平仲毅父撰編宋至五代事以續劉義慶之書

孫公談圃三卷

陳氏曰臨江劉延世錄高郵孫升君孚所談升元祐中書
舍人坐黨謫汀州

麗情集二十卷

晁氏曰皇朝張君房唐英編古今情感事

烏臺詩話十三卷

陳氏曰蜀人朋九萬錄東坡御史獄公案附以初舉發

章疏及謫官後表章書啓詩詞等

碧雲駮一卷

晁氏曰皇朝梅堯臣聖俞撰昭陵時有御馬名碧雲駮以旋毛貴用以名書者詆當時貴之人然其意專在范文正也頃年獲拜趙氏姑于恭南因質此事之誕信荅曰異哉聖俞作謗書以誣盛德蓋誅絕之罪也

陳氏曰題梅堯臣撰以厯馬爲書名其說曰世以旋馬爲醜山以旋毛爲貴雖貴矣病可去乎其不遜如此聖俞必不爾也所記載十餘條公卿多所毀訐雖范文正亦不免或云實魏泰所作託之聖俞王性之辨之甚詳而邵氏聞見後錄乃不然之

邵氏曰梅堯臣著碧雲駮應昭陵時天下大臣惟杜祈公衍富鄭公弼韓魏公琦歐陽公脩無貶外悉譏詆之無少

避范仲淹亦在詆中以仲淹微時常結中書吏人范仲尹因以破家仲淹旣貴略不收卹王銍不服以爲魏泰僞託堯臣著此書銍跋范仲尹墓誌云近時襄陽魏泰者場屋不得志喜僞作他人著書如志恠集括異志倦游錄盡假名武人張師正又不能自抑出其姓名作東軒筆錄皆用私喜怒誣讖前人最後作此書且范仲淹與歐陽脩梅堯臣立朝同心詎有異論特堯臣子孫不輝故挾之借重以欺世今錄楊闢所作范仲尹墓誌庶幾知泰亂是非之實至此也則其他泰所厚誣者皆迎刃而解可盡信哉銍猶及識泰知其從來最詳張而明之使百世之下仲淹不蒙其謬焉穎人王銍題博以爲不然亦書其下仲淹不蒙其謬焉使仲淹不蒙其謬堯臣亦不失爲君子矣然堯臣蚤接諸公名聲相上下獨窮老不振中不能無躁其聞范仲

淹訃詩云一出屢更郡人皆望酒壺俗情難可學奏記向來無貧賤常甘分崇高不解諛雖然門館隔泣與衆人俱夫爲郡而以酒悅人樂奏記納諛伎豈所以論范仲淹堯臣之意真有所不足耶如著彥博燈籠錦事則又與書竄詩合矣故疑此書實出於堯臣

李氏曰碧雲駮一書凡慶曆以來名公鉅卿無不譏詆世傳此書以爲出於梅堯臣然對之口其後諸公論議多矣如葉夢得王銍則以爲非堯臣所爲而邵博乃疑其詩以爲堯臣之意真有所不足遂以此書爲實出於堯臣今以魏泰東軒筆錄考之然後知泰之嫁名於堯臣者不特此書也筆錄載文彥博燈籠錦事大略如碧雲駮所云其載堯臣作唐介書竄詩則句語狂肆非若堯臣平時所作簡古純粹平淡深遠又曰堯臣作此詩不敢示人及歐陽脩爲編其集時有嫌避又削去此詩是以人少知者詳味此言是泰旣以此詩嫁於堯臣又慮議者以爲脩所編無此遂曰脩有嫌避而此不載皆無所考之詞也觀此則謂泰以碧雲駮之書假名堯臣不妄矣况堯臣平日爲人仁厚樂易未嘗忤於物歐陽脩嘗以此而銘其墓使堯臣怨懟果爲此書以厚誣名臣則所養可知矣今市井輕浮之子未必爲之而謂堯臣爲之哉

孔氏野史一卷

容齋洪氏隨筆曰世傳孔毅甫野史一卷凡四十事予得其書於清江劉靖之所載趙清獻爲青城宰挈散樂妓以歸爲邑尉追還大慟且怒又因與妻忿爭由此惑志文潞公守太原辟司馬溫公爲通判夫人生日溫公獻小詞爲都漕唐子方峻責歐陽永叔謝希深田元均尹師魯在河

南携官妓游龍門半月不返留守錢思公作簡招之亦不
荅范文正與京東人石曼卿劉潛之類相結以取名服中
上萬言書甚非言不文之義蘇子瞻被命作儲祥宮記大
貂陳衍幹當官事得旨置酒與蘇高會蘇陰使人發御史
董敦逸卽有章疏遂墮計中又云子瞻四六表章不成文
字其他如潞公范忠宣呂汲公吳冲卿傳獻簡諸公皆不
免譏議予謂決非毅甫所作蓋魏泰碧雲駮之流耳溫公
自用龐穎公辟不與潞公子方同時其謬妄不待攻也靖
之乃原甫曾孫佳士也而跋是書云孔氏兄弟曾大父行
也思其人欲聞其言久矣故錄而藏之汪聖錫亦書其後
但記上官彥衡一事豈弗深考云

後山談叢六卷

容齋洪氏隨筆曰後山陳無已著談叢高簡有筆力然所
載國朝事失於不考究多爽其實如云呂許公惡韓富范
三公欲廢之而不能乃建議使行邊及丁文簡因杜祈公
一語之戲而陷杜子美以憾祈公丁晉公以白金賂中使
尼張乖崖之進與張乖崖聞逐萊公而買田宅以自污攷
之諸公出處日月皆不合前四事所係不細乃誕漫如此
蓋前輩不藏國史好事者肆意飾說爲美聽疑若可信故
誤人紀述後山之書必傳於後世懼貽千載之惑予是以
辨之

清虛居士隨手雜錄一卷

陳氏曰王鞏定國撰待制素子張安道之壻

容齋廣錄十卷

晁氏曰皇朝政和中李獻民撰分九門記一時奇麗雜事
鄙陋無稽之言爲多

墨客揮犀十卷續十卷

陳氏曰不知名氏

搜神秘覽三卷

陳氏曰京兆章炳文叔虎撰

石渠錄十一卷

陳氏曰校書郎昭武王伯思長睿撰

石林燕語十卷

陳氏曰葉夢得少蘊撰宣和五年所作也

燕語考異十卷

陳氏曰成都宇文紹奕撰舊聞汪玉山嘗駁燕語之誤而未之見也

玉澗雜書十卷

陳氏曰葉夢得撰其中所記亦當在宣和時所作玉澗者

避暑錄話二卷

石林山居澗水名也

避暑錄話二卷

陳氏曰葉夢得紹興五年所作

巖下放言一卷

陳氏曰葉夢得撰休致後所作

亭省因話錄一卷

陳氏曰兵部尚書新昌石公弼國佐撰

栢臺雜著一卷

陳氏曰石公弼撰雜記典故等事公弼本名公輔改賜今

名為御史攻蔡京甚力竟坐深文論死然本傳言其議論

反覆非純正者

思遠筆錄一卷

陳氏曰翰林學士九江王寓撰以靖康元年七月以禮

部尚書入翰苑雜記當時聞見凡二十七條寓父易簡以布衣召為說書遂顯用寓後拜正轄使虜辭行謫散官嶺表父子俱南下沒於盜

秀水間居錄三卷

陳氏曰丞相汝南朱勝非藏一撰寓居宜春時作秀水者袁州水名也

紺珠集十三卷

晁氏曰皇朝朱勝非編百家小說成此書舊說張燕公有紺珠見之則能記事不忘故以為名

陳氏曰視會慥類說為略

類說五十卷

晁氏曰皇朝會慥編其序云閒居銀峯因集百家之說纂集成書可以資治體助名教供笑談廣見聞

陳氏曰所編傳記小說古今凡二百六十餘種

春渚紀聞十卷

陳氏曰浦城何遠撰自號韓青老農東坡所薦為武學博士曰去非者其父也

曲洧舊聞一卷

雜書一卷

骹骹說一卷

陳氏曰直秘閣新安朱弁少章撰弁於晦菴為從父建炎丁未使虜留十七年既歸而卒骹骹說者以續晁無咎詞話而晁書未見

南游記舊一卷

陳氏曰曾紆公衮撰

聞見後錄二十卷

陳氏曰邵某撰

翰墨叢記五卷

陳氏曰樞密睢陽滕康子濟撰

鐵圍山叢談五卷

陳氏曰蔡條撰謫鬱林博白時所作

侍兒小名錄一卷續一卷

陳氏曰序題朋谿居士而不著名氏始洪炎玉父集為此書王銍性之温豫彥幾續補今又因三家而增益之且為分類其中多用古字或云董彥遠家子弟所為也

萍州可談一卷

陳氏曰吳興朱或無或撰中書舍人服行中文子宣和元年序萍州老圃其自號也在黃州蓋其僑寓之地事見齊安志而或作或字無惑未詳孰是

硯岡筆志一卷

陳氏曰唐稷撰自號硯岡居士

泊宅編十卷

陳氏曰方勺仁聲撰泊宅在烏程相傳張志和泊舟浮家泊宅之所勺買田卜築泊宅翁本嚴瀨人

却掃編三卷

陳氏曰吏部侍郎睢陽徐度敦立撰

間燕常談三卷

陳氏曰董弁令升撰取士相與談仁義於間燕之義

唐語林八卷

陳氏曰長安王讜正甫撰以唐小說五十家倣世說分門三十五又益十七為五十二門中興書目十一卷而闕記事以下十五門又云本亦止八卷而門目皆不闕

紀談錄十五卷

陳氏曰稱傳密居士不著名氏蓋晁公邁伯咎也

道山清話一卷

陳氏曰不知何人跋語稱大父國史在館閣久多識前輩著館秘錄曝書記與此而三兵火散失近得此書於曾仲存家末題朝奉大夫暉亦不著姓

復齋閑記四卷

陳氏曰承議郎歷陽龔相聖任撰待制原之孫頤正之父也

鄞川志五卷

陳氏曰中書舍人龍舒朱翌新仲撰寓居四名故曰鄞川窓間記聞一卷

陳氏曰稱陳子兼撰未知何人雜論詩文經傳亦間述所聞事

枕中記一卷

陳氏曰不著名氏崇寧中人所載多國初事

賢異錄一卷

陳氏曰亦無名氏所記四事其一曰鬼傳者言王融家子弟所遇與世傳王子高事大同小異當是一事耳

姚氏殘語一卷

陳氏曰刻姚寬令威撰

稿簡贅筆二卷

陳氏曰承議郎章淵伯深撰始得此書於程文簡氏不知

何人作文簡題其後以其中稱先丞相申公知其為章厚子孫也余又以其書考之言先祖光祿元祐三年省試東

坡知舉擢為第一則又知其為援之孫也後以問諸章始得其名字其人博學有文以場屋待士薄如防寇盜用蔭

入仕遂不就舉居長興故序稱若溪草堂淵自號懲室子

序言錄爲五卷今此惟分上下卷

能改齋漫錄十三卷

陳氏曰太常寺主簿臨川吳曾虎臣撰

揮麈錄三卷後錄十一卷第三錄三卷餘話一卷

陳氏曰朝請大夫汝陰王明清仲言撰明清銓之子曾紆公袞之外孫故家傳聞前言往行多所憶後錄跋稱六卷今多五卷

投轄錄一卷

陳氏曰王明清撰所記奇聞異事客所樂聽不待投轄而留也

吳船錄一卷

陳氏曰范成大至能撰自蜀帥東歸紀遊取門泊東吳萬里船之語

老學庵筆記十卷

陳氏曰陸游務觀撰生識前輩年登耄期所記見聞殊可觀也

夷堅志甲至癸二百卷支甲至支癸一百卷三甲至三癸一百卷四甲四乙二十卷大凡四百二十卷

陳氏曰翰林學士鄱陽洪邁景廬撰稗官小說昔人固有爲之者矣游戲筆端資助談柄猶賢乎已可也未有卷帙如此其多者不亦謬用其心也哉且天壤間反常反物之事惟其罕也是以謂之怪苟其多至於不勝載則不得爲異矣世傳徐鉉喜言恠賓客之不能自通與失意而見斥絕者皆詭言以求合今邁亦然晚歲急於成書妄人多取廣記中舊事改竄首尾別爲名字以投之至有數卷者亦不復刪潤徑以入錄雖叙事猥釀屬辭鄙俚不恤也

睽車志五卷

陳氏曰知興國軍歷陽郭彖次象撰取睽上六載鬼一車之語

經鋤堂雜志八卷

陳氏曰倪思正甫撰

續釋常談二卷

陳氏曰祕書丞龔頤正養正撰昔有釋常談一書不著名氏家藏亦闕此書今故以續稱凡常言俗語皆注其所出

北山記事十二卷

陳氏曰戶部侍郎濡須王邁少愚撰

瑣碎錄二十卷

後錄二十卷

陳氏曰溫革撰陳曄增廣之後錄者書坊增益也

夷堅志類編三卷

陳氏曰四川總領陳曄日華取夷堅志中書文藥房類為

一編

雲麓漫抄二十卷 續抄二卷

陳氏曰通判徽州趙彥衛景安撰續二卷乃中庸說及漢定安公補紀也彥衛紹熙間宰烏程有能名

傲告一卷

陳氏曰不著名氏專叙報應

鑑誠別錄三卷

陳氏曰廬陵歐陽邦基壽卿撰周益公洪景盧有序跋

樂善錄十卷

陳氏曰蜀人李昌齡伯崇撰以南中勸戒錄增廣之多因果報應之事

山齋愚見十書一卷

卷首

卷首

卷首

卷首

陳氏曰稱灌圃耐得翁不知何人

程史十五卷

陳氏曰岳珂撰程史者猶言柱記也

游宦紀聞十卷

陳氏曰鄱陽張世南光叔撰

鼠璞一卷

陳氏曰戴埴撰

夷堅別志二十四卷

王質景文撰自序略曰志怪之書甚夥至鄱陽夷堅志出則盡超之余平生所嗜略類洪公始讀左傳史記漢書稍得其記事之法而無所施因志怪發之久之習熟調利滋耽翫不能釋間自觀覽要不爲無補於世而古今文章之關鍵亦間有相通者不以是爲無益而中書愈裒所見聞

益之事五百七十卷二十四今書之目也余心尚未艾書當如之則將浸及於夷堅矣凡夷堅所有而未備者補之黃元道之更生佛之類是也凡夷堅所有而未備者補之黃元道之類是也其名稱仍爲夷堅而別志之辨於鄱陽也得歲月者紀歲月得其所者紀其所得其人者記其人三者并書之備矣闕一二亦書皆闕則弗書醜而不欲著姓名者婉見之如夷堅二確夢之類是也醜而姓名不可不著者顯揭之如夷堅人牛之類是也其稱某人云又某人得諸某人云若已所見各識其所自來皆循夷堅之規弗易所書甲子之一爲期過是弗書耳目相接也所書鬼神之事爲主非是弗書名實相稱也於夷堅之規皆仍之其異也者筆力矚乎其後六

文獻通考卷之二百十七

吳應龍寫

文獻通考卷之二百十八

宋鄱陽 馬端臨 貴與 著

明蘄陽 馮天馭 應房 校刊

經籍考 子 農家

漢藝文志曰農家者流蓋出於農稷之官播百穀勸耕桑以足衣食故八政一曰食二曰貨孔子曰所重民食此其所長也及鄙者為之以為無所事聖王欲使君臣並耕諄上下之序

宋三朝藝文志歲時者本於恭秩平秩之義殖物寶貨著譜錄者亦出助衣食之源故咸見於此

陳氏曰農家者流勤耕桑以足衣食神農之言許行學之漢世野老之書不傳於後而唐志著錄雜以歲時月令及相牛馬諸書是猶薄有關於農者至於錢譜相具膺鶴之

屬於農何預焉今既多從其類而花果栽植之事猶以農
圃一體附見於此其實則浮末之病農者也

漢志九家一百一十四部

隋志五部一十九卷

唐志十九家二十六部二百三十五卷

宋三朝志三十二部二百一十三卷

宋兩朝志十二部四十七卷

宋四朝志一十九部三十三卷

宋中興志六十四家六十九部一百四十八卷

齊民要術十卷

晁氏曰元魏賈思勰撰記民俗歲時治生種時之事凡九
十二篇農家者本出於神農氏之學仲尼既稱禮義信足
以化民焉用稼以誦樊須而告曾參以用天之道分地之

利為庶人之孝言非不同意者以躬稼非治國之術乃一
身之任也然則士之倦游者詎可不知乎故今所取皆種
藝之書也前世錄史部中有歲時子部中有農事兩類實
不可分今合之農家又以錢譜實其間今以其不類移附
類書

陳氏曰起自耕農終於醯醢資生之業靡不畢書其曰治
生之道不仕則農蓋名言也

巽巖李氏序孫氏齊民要術音義解釋曰賈思勰著此書
專主民事又旁摭異聞多可觀在農家最雋然出其類而
近世學者忽焉第奇字錯見往往艱讀今運使秘丞孫公
為之音義解釋略備其正名十物蓋與楊雄郭璞相上下
不但借助於思勰也此書李淳風嘗演之淳風書遽亡韓
鄂又撮思勰所記別著四時纂要五卷本朝天禧四年詔

並刻二書以賜勸農使者然其書與律令俱藏衆弗得習市人輒抄要術之淺近者摹印相師用才一二此有志於民者所當惜也今公幸以稽公餘力悉發其隱蓋併刻焉豈惟決疑糾繆有益學者抑使斯民日用知所本末更被天禧遺澤不亦可乎

四時纂要五卷

晁氏曰唐韓諤撰諤徧閱農書取廣雅爾雅定土產取月令家令叙時宜採汎勝種樹之書掇崔寔試穀之法兼刪韋氏目錄齊民要術編成

陳氏曰雖時令之書然皆爲農事也

山居要術一卷

陳氏曰稱王旼撰館閣書目作王旼皆莫知何時人也

蠶書二卷

陳氏曰孫光憲撰光憲事迹見小說類

秦少游蠶書

見少游淮海集第六卷序略曰子閑居婦善蠶從婦論蠶作蠶書考之禹貢揚梁幽雍不貢繭物充篚織文徐篚玄織縞荆篚玄纁璣組豫篚織纈青篚壓絲皆繭物也而桑土旣蠶獨言於充然則九州蠶事充爲最乎予游濟河之間見蠶者豫事時作一婦不蠶比屋詈之故知充人可爲蠶師今予所書有與吳中蠶家不同者皆得之充人也

禾譜五卷

陳氏曰宣德郎溫陵曾安止移忠撰東坡所爲賦秧馬歌也謂禾譜文旣溫雅事亦詳實惜其不譜農器故以此歌附之安止熙寧進士嘗爲彭澤令

農器譜三卷續二卷

陳氏曰耒陽令曾之謹撰安止之姪孫也追述東坡作歌
之意爲此編周益公爲之序陸務觀亦作詩題其後

周平園序曰紹聖初元蘇文忠公軾南遷過太和邑人宣
德郎致仕曾公安止獻所著禾譜文忠美其溫雅詳實爲
作秧馬歌又惜不譜農器時曾公已喪明不暇爲也後百
餘年其姪孫耒陽令之謹始續成之凡耒耜耨耨車戽簞
笠鉏刈篠簣杵臼斗斛釜甑倉庾厥類惟十附以雜記勒
成三卷皆考之經傳參合今制無不備者是可補伯祖之
書成蘇公之志矣其序牛犁蓋一編之館轄予嘗學稼因
演其說山海經曰后稷之孫叔均始作牛耕世以爲起於
三代予謂不然牛若常在畎畝武王平定天下胡不歸之
三農而放之桃林之野乎故周禮祭牛之外以享賓駕車
犒師而已未及耕也不然牽以蹊田正使藉稻何足爲異

乃設奪而罪之之喻耶在詩有云載芟載柞其耕澤澤十
耦其耘徂隰徂畛又曰有略其耜俶載南畝以明竭作於
春皆人力也至於穫之積之如墉如櫛然後殺時特牲有
採其角以爲社稷之報若使之耕曾不如迎猫迎虎列於
蜡祭乎厥後王弼傳易以爲稼穡之資宋景文公祈闕之
曰古者牛惟服車書肇牽車牛易服牛乘馬漢趙過始教
牛耕蓋本賈思勰齊民要術予謂輔嗣固失矣賈氏及景
文亦未爲得也按論語子謂仲弓曰犁牛之子騂且角雖
欲勿用山川其舍諸此聖人格言也蓋犁田之牛純雜牝
牡皆可祭牛則非純非牡不可故曰騂且角也注疏乃以
犁爲雜色騂爲赤純色角爲周正近世諸儒並從此義今
觀周禮牧人時祀特牲必用特牲純色也外祭毀事用羸羸
雜色也是則純雜之辨也封人設其楅衡魯頌夏而楅衡

白牡駢剛是則言角之意也竊疑犁起於春秋之間故孔子有犁牛之言而弟子用耕亦字伯牛彼禮記呂氏月令季冬出土牛示農耕早晚賈誼新書劉向新序俱載鄒穆公曰百姓飽牛而耕暴背而耘大率在秦漢之際何待趙過過特教人耦犁共二牛費省而功倍爾易傳出於魏晉第見牛耕不復考其初而賈公彥考工正義遂謂起於後漢其失尤甚

農書三卷

陳氏曰稱西山隱居全真子陳雱撰未詳何人其書曰田日牛曰蠶洪慶善爲之後序

耕桑治生要備二卷

陳氏曰宣教郎通判橫州何先覺撰紹興癸酉序

耕織圖一卷

陳氏曰於潛令鄞樓璿壽玉撰攻魏參政之伯父也

竹譜一卷

晁氏曰戴凱之撰凱之字慶預武昌人哀輯竹事四字一讀有韻類賦頌李邕鄆云未詳何代人

筍譜二卷

晁氏曰皇朝僧惠崇撰

陳氏曰僧贊寧撰

續酒譜十卷

晁氏曰唐鄭遨雲夏撰纂輯古今酒事以續王績之書

酒譜一卷

陳氏曰汶上竇莘子野撰其人卽著唐書音訓者

北山酒經三卷

陳氏曰不知撰人

茶經三卷

晁氏曰唐太子文學陸羽鴻漸撰載產茶之地造作器具古今故事分十門

陳氏曰羽自號竟陵子又號桑苧翁

顧渚山記二卷

晁氏曰陸羽撰羽與皎然朱放輩論茶以顧渚為第一顧渚山在湖州吳王夫差顧望欲以為都故以名山

煎茶水記一卷

晁氏曰唐張又新撰其所嘗水凡二十種因第其味之優劣

陳氏曰唐涪州刺史張又新撰本刑部侍郎劉伯芻稱水之與茶宜者凡七等又新復言得李季卿所筆陸鴻漸水产品凡二十歐公大明水記嘗辨之今亦載卷末余足跡所

至不廣於水晶僅嘗三四若惠山泉甘美置之第二不香特未知康王谷水何如爾其次吳松第四橋水亦不惡虎丘劍池殊未佳而在第四已不可曉至於雪水清甘絕佳而居其末尤不可曉也大抵水活而後宜茶活而不清潔猶不宜故浮泉石池漫流者為上為其活且潔也若夫天一生水丞為雲雨水之活且潔者何以過此余嘗用淨器承雨水試以烹煎不減雪水故知又新之說妄也

茶譜一卷

晁氏曰偽蜀無文錫撰記茶故事其後附以唐人詩文

建安茶錄三卷

晁氏曰皇朝丁謂撰建州研膏茶起於南唐太平興國中始進御謂咸平中為閩漕監督州吏創造規模精至嚴謹錄其園焙之數圖繪器具及叙採製入貢法式盧仝譏陽

美貢茶有安知百萬億蒼生墜在顛崖受辛苦之句余於
謂亦云

北苑拾遺一卷

晁氏曰皇朝劉昇撰北苑建安地名茶爲天下最異慶曆
初在吳興採新聞附于丁謂茶錄之末其書言滌磨調品
之器甚備以補謂之遺也

補茶經一卷又一卷

晁氏曰皇朝周絳撰絳祥符初知建州以陸羽茶經不載
建安故補之又一本有陳龜注丁謂以爲茶佳不假水之
助絳則載諸名水云

試茶錄二卷

晁氏曰皇朝蔡襄君謨撰襄皇祐中脩注仁宗常面諭云
昨卿所進龍茶其精襄退而記其意試之法成書二卷進

御世傳歐公聞君謨進小團茶驚曰君謨士人何故如此
東溪試茶錄一卷

晁氏曰皇朝朱子安集拾丁蔡之遺東溪亦建安地名其
序謂七閩至國朝草木之異則產臘茶荔子人物之秀則
產狀頭宰相皆前代所未有以時而顯可謂美矣然其草
木厚味難多食其人物多智難獨任亦地氣之異云

呂惠卿建安茶記一卷

晁氏曰皇朝呂惠卿撰

聖宋茶論一卷

晁氏曰右徽宗御製

茶雜文一卷

晁氏曰集古今詩文及茶者

北苑總錄十二卷

陳氏曰興化軍判官曾仇錄茶經諸書而益以詩歌二卷
茶山節對一卷

陳氏曰攝衢州長史蔡宗顏撰

宣和北苑貢茶錄一卷

陳氏曰建陽能蕃叔茂撰其子克義益寫其形製而傳之

北苑別錄一卷

陳氏曰趙汝礪撰

品茶要錄一卷

陳氏曰建安黃儒道父撰元祐中東坡嘗跋其後

荔枝譜一卷 荔枝故事一卷

晁氏曰皇朝蔡襄記建安荔枝味之品第凡三十餘種古

今故事

陳氏曰君謨為此書且書而刻之與牡丹記並行闕無佳

石以板刊歲久地又溫皆蠹朽至今尤藏其家而字多不
完可惜也

增城荔枝譜一卷

陳氏曰無名氏其言福唐人熙寧九年承乏增城多植

荔枝蓋非嶠南之大山實類吾鄉之晚熟搜境內所出得

百餘種其初亦得閩中佳種植之故為是譜

四時栽接花果圖一卷

陳氏曰無名氏

桐譜一卷

陳氏曰銅陵逸民陳翥撰皇祐元年序

何首烏傳一卷

陳氏曰初見唐李翱集今後人增廣之耳

海棠記一卷

陳氏曰吳人沈立撰

橘錄一卷

陳氏曰知温州延安韓彥直子溫撰世忠長子也

菊譜一卷

陳氏曰史正志志道撰孝宗朝為發運使者也

范村梅菊譜二卷

陳氏曰范成大至能撰有園在居第之側號范村

糖霜譜一卷

陳氏曰遂寧王灼晦叔撰言四方所產遂寧為冠灼自號

頤堂

蟹譜二卷

陳氏曰稱怪山傳肱子翼撰嘉祐四年序怪山者越之飛來山也

蟹略四卷

陳氏曰高似孫續古撰

越中牡丹花二品

陳氏曰僧仲林撰其序言越之所好尚惟牡丹其絕麗者三十二種始乎郡齋豪家名族梵宇道宮池臺水榭植之無間來賞花者不間親踈謂之看花局澤國此月多有輕雲微雨謂之養花天里語曰彈琴種花陪酒陪歌末稱丙戌歲八月十五日移花日序丙戌者當是雍熙三年也越在國初繁富如此殆不減洛中今民貧至骨種花之風遂絕何今昔之異耶其故有二一者鏡湖為田歲多不登二者和買者著數倍常賦勢不得不貧也

牡丹譜一卷

晁氏曰歐陽脩撰初調洛陽從事見其俗重牡丹因著花

品凡三篇

陳氏曰蔡君謨書之盛行於世

冀王宮花品一卷

陳氏曰題景祐元年滄州觀察使記以五十種分為三等九品而潛溪緋平頭紫居正一品姚黃及居其下此不可曉也

吳中花品一卷

陳氏曰慶曆乙酉趙郡李英述皆出洛陽花品之外者以今日吳中論之雖曰植花未能如承平之盛也

花譜二卷

陳氏曰滎陽張峒子堅撰以花有千葉多葉黃紅紫白之別類以為譜凡千葉五十八品多葉六十二品又以芍藥附峒與其弟峒子望同登進士第峒嘗從邵康節學

牡丹芍藥花品七卷

陳氏曰不著名氏錄歐公及仲林等諸家牡丹譜孔常甫芍藥譜共為一篇

洛陽貴尚錄一卷

陳氏曰殿中丞新安丘濬道源撰專為牡丹作也其書援引該博而迂恠不經濬天聖五年進士通類知未來壽八十一及斂衣空人以為尸解新安志云爾

芍藥譜一卷

陳氏曰中書舍人清江劉攽貢甫撰

芍藥圖序一卷

陳氏曰待制新淦孔武仲常甫撰

芍藥圃一卷

陳氏曰知江都縣王觀通叟撰三家皆述維揚所產花之

盛

文獻通考卷之二百十八

文獻通考卷之二百十九

宋鄱陽馬端臨貴與著

明蘄陽馮天馭應房校刊

經籍考 子陰陽 天文 五行 形法

陰陽

漢藝文志陰陽者流蓋出於羲和之官敬順昊天歷象日月星辰敬授民時此其所長也及拘者為之則牽於禁忌泥於小數舍人事而任鬼神

漢志二十一家三百六十九篇

天文

漢藝文志曰天文者序二十八宿步五星日月以紀吉凶之象聖王所以參政也易曰觀乎天文以察時變然星事

舛悍非湛密者弗能由也

舛讀與凶同湛讀曰沉由用也

夫觀景以謹形

非明主亦不能服聽也以不能由之臣諫不能聽之主此所以兩有患也

宋三朝藝文志曰國家建官分局觀文察變尤重慎其事太宗卽位知私習冒禁頗爲誑耀悉搜訪考驗黜去繆妄遂下詔禁止之至真宗復申明詔旨重其罪罰自茲澄汰旌別濫學方息而民無所惑矣

兩朝藝文志曰天文圖書藏秘閣西偏有內侍專掌禁私習者嘉祐中大校經史而兵法小學醫術禮書皆分局命官編校定寫唯天文五行未嘗是正諸儒亦莫得考也

漢志二十一家四百四十五卷

隋志九十七部合六百七十五卷

唐志二十家三十部三百六卷

失姓名六家李淳風天文占以下不著錄六家一百七十五卷

宋三朝志八十四部三十二卷

宋兩朝志二十八部一百六卷

宋四朝志二十九部二百四十六卷

宋中興志二十家二十部一百二十七卷

漢藝文志曆譜者序四時之位正分至之節會日月五星之辰以考寒暑殺生之實故聖王必正曆數以定三統服色之制又以探知五星日月之會凶阨之患吉隆之喜其術皆出焉此聖人知命之術也非天下之至材其孰能與焉道之亂也患出於小人而強欲知天道者壞大以爲小削遠以爲近是以道術破碎而難知也

宋兩朝藝文志曆以筭成自建隆迄治平五正曆象作爲銅儀經法具於所司蓋有知筭而不知曆者故曆爲筭本治曆之善積筭遠其驗難而差遲治曆之不善積筭近其驗易而差亦速

漢志十八家六百六卷

隋志一百部二百六十三卷

唐志三十六家七十五部二百三十七卷

失姓名五家王勃以下不著錄十九家百

二十六卷

宋三朝志五十三部二百卷

宋兩朝志三十三部六十四卷

宋四朝志五十二部二百四十三卷

宋中興志三十八家五十一部一百五十八卷

五行

漢藝文志曰五行者五常之形氣也書云初一曰五行次二曰羞用五事言進用五事以順五行也貌言視聽思心矢而五行之序亂五星之變作皆出於律曆之數而分爲一者也其法亦起五德終始推其極則無不至而小數家

因此以爲吉凶而行於世寢以相亂

漢志五行三十一家六百五十二卷

漢志著龜十五家四百一卷

漢志雜占十八家三百一十三卷

容齋洪氏隨筆曰漢藝文志七略雜占十八家以黃帝甘

德占夢二書爲首其說曰雜占者紀百家之象候善惡之

證衆占非一而夢爲大故周有其官周禮太卜掌三夢之

法一曰致夢二曰簡夢三曰咸陟鄭氏以爲致夢夏后氏

所作簡夢商人所作咸陟者言夢之皆得周人作焉而占

夢專爲一官以日月星辰占六夢之吉凶其別曰正曰噩

曰思曰寤曰喜曰懼季冬聘王夢獻吉夢于王王拜而受

之乃舍萌于四方以贈惡夢舍萌者猶釋菜也贈者送之

也詩書禮經所載高宗夢傳說周文王夢帝與九齡武王

伐紂夢叶朕卜宣王考牧牧人有能罷虺蛇之夢召彼故
老訊之占夢左傳所書尤多孔子夢坐奠于兩楹然則古
之聖賢未嘗不以夢為大是以見於七略者如此魏晉方
技猶時時或有之今人不復留意此卜雖市井妄術所在
如林亦無以占夢自名者其學殆絕矣

形法

漢藝文志形法者大舉九州之勢以立城郭室舍形人及
六畜骨法之度數器物之形容以求其聲氣貴賤吉凶猶
律有長短而各徵其聲非有鬼神數使然也然形與氣相
首尾亦有有其形而無其氣者有其氣而無其形者此精
微之獨異也

漢志六家一百二十二卷

隋志五行二百七十二部合一千二十二卷

唐志五行六十家一百六十部六百四十七卷

失姓名六十五家袁天綱以下

不著錄二十五家一百二十二卷

宋三朝志五行四百四十二部一千四百九十七卷

宋兩朝志五行一百一十五部一百六十一卷

宋四朝志五行一百三十四部三百九十二卷

宋中興志五行八十二家八十八部二百八十六卷

宋中興志著龜三十三家三十六部一百一卷

宋中興志雜占八十家八十四部一百七十五卷

宋中興志形法九十五家一百單四部二百六十八卷

陳氏曰自司馬氏論九流其後劉歆七略班固藝文志皆
著陰陽家而天文曆譜五行卜筮形法之屬別為數術略
其論陰陽家者流蓋出於羲和之官敬順昊天歷象日月
星辰拘者為之則牽於禁忌泥於小數至其論數術則又

子
文獻通考卷三百六
以爲義和卜史之流而所謂司星子韋三篇不列於天文而著之陰陽家之首然則陰陽之與數術似未有以大異也不知當時何以別之豈此論其理彼具其術耶今志所載二十一家之書皆不存無所攷究而隋唐以來子部遂闕陰陽一家至董道藏書志始以星占五行書爲陰陽類今稍增損之以時日祿命遁甲等備陰陽一家之闕而其他數術各自爲類

按陳氏之說固然矣然時日祿命遁甲獨非術數乎其所謂術數各自爲類者曰卜筮曰形法然此二者獨不本於陰陽乎蓋班史藝文志陰陽家之後又分五行卜筮形法各自爲類今班志中五行卜筮形法之書雖不盡存而後世尚能知其名義獨其所謂陰陽家二十一種之書並無一存而隋史遂不立陰陽門蓋隋唐間已不能知其名義故無由以後來所著之書續立此門矣然隋書唐書及宋九朝史凡涉乎術數者總以五行一門包之殊欠分別獨中興史志乃用班志舊例以五行占卜形法各自爲門今從之

經籍考

子天文 曆筭

周髀算經二卷音義一卷

陳氏曰題趙君卿註甄鸞重述李淳風等註釋周髀者蓋天文書也稱周公受之商高而以句股爲術故曰周髀唐志有趙嬰甄鸞註多一卷李淳風釋二卷今日君卿者豈嬰之字耶中興書目又云君卿名爽蓋本崇文總目然皆莫詳時代甄鸞者後周司隸也音義假承務郎李籍撰

司天攷古星通玄寶鏡一卷

晁氏曰題曰巫咸氏宋朝太平興國中詔天下知星者詣京師未幾至者百許人坐私習天文或誅或配隸海島由是星曆之學殆絕故予所藏書中亦無幾姑哀數種以備數云

甘石星經一卷

晁氏曰漢甘公石申撰以日月五星三垣二十八舍恒星圖象次舍有占訣以候休咎

星簿讚曆一卷

陳氏曰唐志稱石氏星經簿讚館閣書目以其有徐穎葵占等州名疑後人附益今此書明言依甘石巫咸氏則非專石申書也

乙巳占十卷

陳氏曰唐太史令政陽李淳風撰起筭上元乙巳故以名

焉

玉曆通政經三卷

陳氏曰李淳風撰亦大文占也唐志無之

乾坤變異錄一卷

陳氏曰不著名氏雜占變異凡十七篇

古今通占三十卷

陳氏曰唐高高潛夫沛國武密撰集黃帝巫咸而下諸家及隋以前諸史天文志爲此書景祐乾象新書間取其說中興館閣書目作古今通占鏡本唐志云爾

步天歌一卷

晁氏曰未詳撰人二十八舍歌也三垣頌五星凌犯賦附

十後或云唐王希明撰自號丹元子夾際鄭氏天文略曰隋有丹元子隱者之流也不知名氏

作步天歌見者可以觀象焉王希明纂漢晉志以釋之唐書誤以爲王希明也天文籍圖不籍書然書經百傳不復訛謬縱有訛謬易爲攷正圖一再傳便成顛錯一錯愈錯不可復尋所以信圖難得故學者不復識星向嘗盡求其書不得其象又盡求其圖不得其信一日得步天歌而誦之時素秋無月清天如水誦一句凝目一星不三數夜一天星斗盡在曾中矣此本只傳靈臺不傳人間術家秘之名曰鬼料竅世有數本不勝其訛今則取之仰觀以從稽定然步天歌之言不過漢晉諸志之言也漢晉志不可以得天文者謂所載名數失詳叢雜難舉故也步天歌句中

有圖言不見象或約或豐無餘無失又不言休咎是深知天者今之所作以是爲本舊於歌前亦有星形然流傳易訛所當削去惟於歌之前採諸家之言以備其書云

列宿圖一卷 天象分野圖一卷

晁氏曰未詳撰人

景祐乾象新書三十卷

陳氏曰司天春官正楊雄德等撰以歷代古書及春秋至

五代諸史採摭撰集元年七月書成賜名仍御製序

晁氏曰今惟三卷

大宋天文書十五卷

陳氏曰不著名氏館閣書目亦無之意其爲太史局見今施行之書蓋供報占驗大抵出此

天經十九卷

陳氏曰同州進士王及甫撰不知何人其書定是非協同異由博而約儒者之善言天者也

天象法要二卷

陳氏曰丞相溫陵蘇頌子容撰元祐三年新造渾天成記其法要而圖其形象進之

歷代星史一卷

陳氏曰不著名氏抄集諸史天文志

天文考異二十五卷

陳氏曰昭武布衣鄒淮撰大抵襲景祐新書之舊淮後入

大宋太史局

二十四氣中星日月宿度一卷

陳氏曰此書傳之程文簡家公得於荆判局荆名大聲太史局官也

天象義府九卷

陳氏曰宜黃布衣應庠撰其書考究精詳論議新奇而多穿鑿傳會象垂於天其曰某星主某書者人實名之也開

闕之初神聖在御地天之道未絕其必有得於仰觀俯察之妙者故曰天垂象聖人則之夫天豈諄諄然命之乎如必一切巧為之說而以為天意實然則幾於矯誣矣

崇天香 右天文

合元萬分曆一卷

晁氏曰唐曹氏撰未知其名曆元起唐高宗顯慶五年庚申蓋民間所行小曆也本天竺曆為法李獻臣云

曆法一卷

晁氏曰未詳撰人曆草也

唐大衍曆議十卷

陳氏曰唐僧一行作新曆草成而卒詔張說與曆官陳玄景等次為曆術七篇略例一篇曆議十篇新史志略見之十議者一曆本二日度三中氣四合朔五卦候六九道七

日晷八分野九五星十日食大抵皆以考正古今得失也
曆志略取其要著于篇者十有二曰曆本曰中氣曰合朔
曰卦候曰卦曰日度曰九道曰日食曰五星蓋曆議之八
篇而分卦候爲二故共爲九條其沒滅盈縮晷漏中星三
條則皆取之略例餘曆議日晷分野二篇則具之天文志
嘉定辛未辭科用爲序題有劉澹如者蓋得其書自詭必
在選中而考官但据史文初不知此書尚存於世也以其
篇次與史文不合黜之要之史官因此書以述志考官因
史志以命題當以書爲本參考志之所載乃爲全善

崇天曆一卷

陳氏曰司天夏官正權判監宋行古等撰天聖二年上學
士晏殊序國初有建隆應天曆次有乾元曆儀天曆詳見
三朝史志

紀元曆三卷立成一卷

陳氏曰姚舜輔撰崇寧五年成自崇文之後有明天曆熙
寧奉元曆元祐觀天曆至崇寧三年舜輔造新曆曰占天
未幾蔡京又令舜輔更造用帝受命之年卽位之日元起
庚辰日命已卯上親製片放之天下賜名紀元本朝承平
諸曆略具正史志不見全書此二曆近得之蜀人秦九詔
道古故存之

統元曆一卷

陳氏曰常州布衣陳得一更造秘書少監朱震監視紹興
五年上曆家不以爲工

會元曆一卷

陳氏曰夏官正劉孝榮造禮部尚書李燾序紹熙元年也
孝榮判太史局凡造三曆此其最後者勝前遠矣

統天曆一卷

陳氏曰冬官正楊忠輔撰丞相京鏜表進其曆議甚詳至於星度明言不會測驗無候簿可以立術最為不欺紹熙五年也其末有神殺一篇流於陰陽拘忌則為俚語開禧曆三卷立成一卷

陳氏曰大理評事鮑澣之撰進時開禧三年詔附統天曆推筭至今須曆用統天之名而實用此曆當時緣金虜閏月與本朝不同故於此曆加五刻天道有常而造術以就之非也大抵中興以來雖屢改曆而日官淺鄙不知曆象之本但模襲前曆而於氣朔皆一時遷就爾

金虜大明曆十卷

陳氏曰亡余大定十三年所為也其術疎淺不足取積年三億以上其拙可知然統天開禧改曆皆緣朝論以北曆得天為疑貴耳賤目由來久矣寔不然也

數術大略九卷

陳氏曰魯郡陳九韶道古撰前世筭術自漢志皆屬曆譜家要之數居六藝之一故今解題列之雜藝類惟周髀經為蓋天遺書以為曆象之冠此書本名數術而前二卷大衍天時二類於治曆測天為詳故亦置之於此秦博學多能尤邃曆法凡近世諸曆皆傳於秦所言得失亦悉著其語云

集聖曆四卷

晁氏曰皇朝楊可集可久為周天冬正官正緝古今陰陽書彙為四時以涓擇日辰云

百中經三卷

晁氏曰自紹興二十一年以上百二十年曆日節文也

刻漏圖一卷

晁氏曰皇朝燕肅撰肅有巧思上蓮花漏法嘗知潼州有
石刻存焉洛陽宋君者增損肅之法為此圖

官曆刻漏圖一卷蓮花漏圖一卷

陳氏曰太常博士王普伯照撰

右曆筭

文獻通考卷之二百十九

文獻通考卷之二百二十

宋鄱陽馬端臨貴與著

明斬陽馮天馭應房校刊

經籍考 子五行 占筮 形法

廣古今五行志三十卷

晁氏曰竇盞撰唐志有其目未詳何人纂五行變異敘其
徵應蓋為洪範之學者自古術數之學多矣言五行則本
洪範言一筮則本周易近時兩者之學殆絕而最盛于世
者葬書相術五星祿命六壬遁甲星禽而已然六壬之類
足以推一時吉凶星禽五星祿命相術之類足以推一身
之吉凶葬書之類足以推一家之吉凶遁甲之類足以推
一國之吉凶其所知若有遠近之異而或中或否不可盡
信則一也

遁甲萬一訣一卷

晁氏曰題云唐李靖所纂黃帝書按遁甲之書見於隋志凡十三家則其學之來亦不在近世矣以休生傷杜景死驚開八門推國家之吉凶通其學者以為有驗未之嘗試也

遁甲經一卷

晁氏曰唐胡乾撰李氏書目亦云九天玄女術推九星八門三奇六儀之法

景祐遁甲玉函符應經二卷

陳氏曰司天春官正楊惟德撰御製序

景祐太乙福應集要十卷

陳氏曰楊惟德撰御製序末題紹興元年嵩陽潛士魏郡劉箕其積筭自建炎三年巳酉推之者其所附益也九宮

八門與遁甲相表裏字多訛未有他本可校

陰陽二遁圖局一卷并雜訣

三元立成圖局二卷

遁甲八門機要一卷

太乙淘金歌一卷

陳氏曰巳上四種皆無名氏得之盱江吳炎

遁甲選時圖二卷

陳氏曰紹興府所刻本亦無名氏

秤星經三卷

晁氏曰不著撰人以日月五星羅喉計都紫氣月孛十一

曜演十二宮宿度以推人貴賤壽夭休咎不知其術之所

起或云天竺梵學也按洪範曰歲月日時無易百穀用成

又用明俊民用章家用平康月之從星則以風雨冷州鳩

曰武王伐殷歲在鶉火月在天駟一曰在析木之津辰在斗柄星在天龜以此言之五星之術其來尚矣蓋可以占國則可以占事可以占事則可以占人也然術家用日月五星以占吉凶又加以交初交中之神紫氣月孛之宿初中者交食之會亦可以意求惟氣字無稽而術家獨以為効且曰土木之餘氣五星之行土木最遲而為吉凶者久故有餘氣云

周易十二論一卷

晁氏曰未詳撰人論日月五星直年以占吉凶

珞琭子三命一卷

晁氏曰李獻臣云珞琭者取珞珞如玉琭琭如石之義推人生休咎否泰之法箕子曰五行水火金木土禹曰辛壬癸甲則甲子五行之名蓋起於堯舜三代之時矣鄭氏釋

天命之謂性曰謂木神則仁金神則義之類又釋我辰安在曰謂六物之吉凶此以五行甲子推知休咎否泰於其傳者也呂才稱起於司馬季主及王克其言淺哉然才所詆建祿背祿三刑劫殺建學空亡勾絞六害驛馬之類皆今世三命之術也亦在才之前矣由是觀之視他術淵源獨遠且小運之法本于說文己字之訓空亡之說本于史記孤虛之術多有所自來故精於其學者巧發竒中最多陳氏曰此書祿命家以為本經其言鄙閭巷賣卜人所為也

珞琭子疏五卷

晁氏曰皇朝李全東方明撰

李虛中命書三卷

晁氏曰唐李虛中撰虛中字常容姓纂云冲之八代孫學

最深於五行書壽夭貴賤利不利輒先處其年時百不失
一韓愈言冲爲虛中十一世祖誤也

河圖天運二賦一卷

晁氏曰不著撰人論天地二運蓋三命書也崇文目以爲
卜筮類

壺中賦一卷

陳氏曰稱紫雲溪壺中子莫知何人

源髓歌六卷後集三卷

陳氏曰唐沈之撰後集妄也

太乙命訣一卷

陳氏曰稱袁天綱妄人假託

五命秘訣一卷

晁氏曰皇朝林開撰三命之術年月日支干也加以時胎

故曰五命

鮮鶚經十卷

晁氏曰未詳撰人凡十門六十二章以星禽推知人之吉
凶言其情性嗜好爲尤驗說者謂本神仙之訣也故此書
載於道藏李邯鄲云羅浮山逍遙子撰

紫堂訣三卷

晁氏曰紫堂先生撰未詳何代人著紫垣十二星至隱曜
總三百六十位分二十八舍附之以五星配十二辰以推
人命之吉凶

五星命書一卷

陳氏曰不著名氏然歌訣頗詳然未必驗也

五星三命指南十四卷

陳氏曰亦不知名氏大抵書坊售利求俗師爲之

聿斯歌一卷

陳氏曰青羅布衣王希明撰不知何人
靈臺三十六歌一卷

陳氏曰稱武平先生亦不知何人
五星六曜約法一卷

洞微歌一卷

紫宙經一卷
陳氏曰以上三種皆無名氏
四門經一卷

陳氏曰唐待詔陳周輔撰
青羅立成曆一卷

陳氏曰司天監朱奉奏據其曆起貞元十年甲戌入曆至今乾寧四年丁巳則是唐末人

雜計二隱曜立成曆一卷

陳氏曰稱太中大夫曹士蔦亦莫知何人但云起元和元年入曆

諸家五星書一卷

陳氏曰雜錄五星祿命之說前數家多在焉

遁甲八門命訣一卷

陳氏曰不知名氏

信齋百中經一卷

陳氏曰不著名氏安慶府本術士言最善

怡齋百中經一卷

陳氏曰東陽術士曹東野自言今世言五星者皆用唐顯慶曆曆法迨本朝前後無慮十餘變而百中經猶守舊安得不差於是見行曆法推筭其說如此未知能質也

五行精紀三十四卷

陳氏曰清江鄉貢進士廖中撰周益公為之序集諸家三命說

三辰通載三十四卷

陳氏曰嘉禾錢如璧編集五星命術

廣濟陰陽百忌曆二卷

陳氏曰稱唐呂才撰有序按才序陰陽書其三篇見於本傳曰祿命曰卜宅曰遷葬盡掃世俗拘滯之論安得復有此曆本初固已假託後人附益尤為不經

三曆會同十卷

陳氏曰不知作者集百忌總聖集正三書

萬曆會同三十卷

陳氏曰陳從古撰以前書推廣之書坊售利之貝也

彈冠必用一卷

陳氏曰周謂撰專為宦游擇日設

三曆撮要一卷

陳氏曰無名氏又一本名擇日撮要曆大略皆同建安徐清叟真翁云其尊人尚書公應龍所輯不欲著名

陰陽備用十二卷

陳氏曰通判舒州新安胡舜甲汝嘉撰此書本為地理形法而諸家選對日法要皆在焉故附于此

右五行

焦氏易林十六卷

晁氏曰漢天水焦延壽傳易於孟喜此其所著書也費直題其前曰六十四卦變又有唐渝王序所書每卦變六十四總四千九十六首皆為韻語與左氏傳載鳳凰于飛和

鳴鏘鏘漢書所載大橫庚子爲天王之語絕相類豈古
之卜者各有此等書耶

石林葉氏曰吾家有焦貢易林京房易二書大抵皆卜筮
陰陽氣候之言不復更及易道考之班固儒林傳漢初傳
易大抵皆本之而何曰焦貢獨得隱士之說以授京房貢
嘗從孟喜問易會喜死房卽以其學出孟氏其徒翟牧白
生不肯皆曰非也然孟喜雖授學田王孫至其候陰陽災
變言田生死時枕喜膝獨傳喜其實妄也故梁丘賀辨以
爲田生絕施讎手中時喜歸東海無此事則二氏書其源
流固無所本縱焦貢書出孟氏周謬矣如趙賓說箕子明
夷爲箕子者萬物方茲茲也云受於喜爲喜爲名之則喜
乃妄人而已

陳氏曰又名大易通變唐會昌景寅越五雲谿王俞序凡

四千九十六卦其辭假出於經史其意雅通於神祇蓋一
卦可以變六十四也舊見沙隨程迥所記南渡諸人以易
林筮國事多奇驗求之累年寶慶丁亥始得之莆田皆韻
語古雅頗類左氏所載繇辭或時援引占事間嘗筮之亦
驗頗恨多脫誤嘉熙庚子從湖守王寺丞借本兩相校
十得八九其中亦多重復或諸卦數爻共一繇莫可考也

八神筮法二卷

晁氏曰以八卦世分六十四卦每卦首爻云于夏云論易
筮之吉凶

靈棋經二卷

晁氏曰漢東方朔撰又云張良劉安未知孰是晉顏幼明
宋何承天注有唐李遠敘歸來子以爲黃石公書豈謂以
授良者耶按南史載客從南來遺我良財寶貨珠璣金盃

玉孟之繇則古之遺書也明矣凡百二十卦皆有繇辭
靈龜經一卷

晁氏曰史蘇撰論龜兆之吉凶崇文曰三卷
易傳積算法雜占條例一卷

陳氏曰漢京房撰詳已見易類世所傳京氏遺學不過如此而已今世卜者世應飛伏納甲之筮皆出京氏
周易版詞一卷

陳氏曰不知名氏當是漢魏以前人所為其間官名皆東京制也

周易玄悞一卷

陳氏曰題李淳風撰

火珠林一卷

陳氏曰無名氏今賣卜者擲錢占卦盡用此書

小著古法一卷

陳氏曰開封鄭克武子撰

著卦辨疑序三卷

陳氏曰郭雍撰自序略言學者相傳謂九為老陽七為少陽六為老陰八為少陰及觀乾爻稱九坤爻稱六則九六為陰陽蓋無疑也而六子皆稱九六不言七八則少陰少陽未有所據及考乾坤之策曰乾之策二百一十有六坤之策百四十有四六一則乾爻得三十六坤爻得二十四是則老陰老陽之數也又考二篇之策陽爻百九十有二以三十六乘之積六千九百十有二陰爻百九十有二以二十四乘之積四千六百八合之為萬有一千五百二十則二篇之策亦皆老陰老陽之數也而少陰少陽之數又無所見再置陽爻百九十有二以少陽二十八乘之積

五千三百七十六再置陰爻百九十有二以少陰三十二乘之積六千一百四十四合之亦為萬有一千五百二十以是知少陰少陽之數隱於老陰老陽之中如是則七九皆為陽六八皆為陰其畫為奇為耦皆同聖人畫卦初未必以陰陽老少為異然卜史之家欲取動爻之後卦故分別老少之象與聖人畫卦之道已不同矣然七九為陽六八為陰蓋謂陰陽各有二道與說卦言立天之道曰陰與陽立地之道曰柔與剛其義皆同是道也以聖人不明載之繫辭後世紛紛互相矛盾至有大失聖人之意者大率多主卜史之論不知所謂策數遂妄為臆說也

朱子語錄曰揲著雖是一小事自孔子來千五百年都理會不得唐時人說得雖有病痛大體理會得是近來說得大乖自郭子和始奇者揲之餘為奇扞者歸其餘扞二

指之中今子和反以掛一為奇而以揲之餘為扞又不用老少只用三十六三十二二十八二十四不知為策數以為聖賢從來只說陰陽不曾說老少不知他既無老少則七八九六皆無用又何以為卦又曰龜為卜策為筮策是餘數謂之策他只是胡亂說策字或問他既如此說則再扞而後掛之說何如曰他以第一揲扞為扞第二第三揲不掛為扞第四揲又掛然如此則無五年再閏如某已前排真个是五年再閏聖人下字皆有義理掛者挂也扞者勒於二指之中也

常陽經一卷

晁氏曰崇文目題曰黃帝式用蓋六壬占卜術也

六壬要訣一卷

晁氏曰未詳何人撰隋志載六壬之書兩種金鑿室記及

五代史記頗言其驗今世龜筮道息而此術獨行

六壬課鈴一卷

晁氏曰未詳何人所纂以六十甲子加十二時成七百二十三課三傳入神以占吉凶

玉關歌一卷

晁氏曰不題撰人六壬課訣也

六壬翠羽歌一卷

陳氏曰後唐長興中僧令岑撰錯誤極多未有它本可校

六壬洞微賦一卷

陳氏曰不知名氏瞽卜劉松年所傳

京氏參同契律曆志一卷

陳氏曰虞翻注專言占象而不可盡通字亦多誤未有別

本校

京氏易式一卷

陳氏曰晁說之以道撰

占燈法一卷

觀燈法一卷

晁氏曰唐李淳風撰崇文總目亦有之

右占筮

八五經一卷

晁氏曰序云黃帝書八五謂八卦五行雖後人依託而其

辭亦馴雅相墓書也呂才葬篇以六說詰其不驗且云世

人之為葬巫所欺忘擗踊荼毒以期徼幸由是相埒隴依

官爵擇時日規財利誠哉是言也

陳氏曰序稱太將軍記室郭璞後序言余受郭公囊書數

篇此居一公戒以秘之丞相王公盡索余書余以公言告

之得免末稱太興元年六月蓋晉元帝時王公謂導也然

皆依託耳其書為相墓作

狐首經一卷

陳氏曰不著名氏稱郭景純序亦依託也胡汝嘉始序而傳之其文亦雅馴言頗有理

續葬書一卷

陳氏曰稱郭景純撰鄙俗依託

青囊補注三卷

晁氏曰郭璞撰世傳葬書之學皆云無出郭璞之右者今盛行皆璞書也按璞傳載葬母事世傳蓋不誣矣璞未幾為王敦所殺若謂禍福皆係於葬則璞不應擇凶地以取禍若謂禍福有定數或他有以致之則葬地不必擇矣嗚呼璞自用其術尚如此况後遵其遺書者乎

撥沙經一卷

晁氏曰唐呂才撰地理書畫山水之形成圖蓋依託者

青囊本旨一卷

晁氏曰不記撰人演郭璞相墓青囊經也

洞林別訣一卷

尋龍入式一卷

晁氏曰江南范越鳳集郭璞所記諸家地理書得失為此書二十四篇并司空班尋龍入式歌附

陳氏曰又名洞林別訣范越鳳相傳縉雲人家于將樂

地理少一卷

陳氏曰稱李淳風亦未必然

會元經二十四卷

晁氏曰孫季邕撰未詳何代人集諸家相地書其鄙陋無驗者成是書

金鎖正要一卷

玄談經一卷

錦囊遺錄一卷

五行統例一卷

晁氏曰四書皆地理書也

五音地里新書三十卷

晁氏曰唐僧一行撰以人姓五音驗八山三十八將吉凶之方其學今世不行

地里口訣一卷

陳氏曰不知何人所集曰楊筠松曾楊乙黃禪師左仙朱仙桃范越鳳劉公賴太素張師姑王吉凡十家

楊公遺訣曜金歌并三十六圖象一卷

陳氏曰楊即筠松也又號楊救貧

神龍鬼砂一卷

羅星妙論一卷

陳氏曰皆不知作者

九星賦一卷

陳氏曰題范公

陰陽精義二十篇

朱伯起撰水心序伯起從鄭公景望學而與景元爲友酷嗜地里談山如啖蔗浮海葬妻大芙蓉云後百年當驗著書二十篇論原起乘止尤詳二鄭因是喜陰陽家余嘗怪蘇公子瞻居陽羨而葬嵩山一身豈能應四方山水之求近時朱公元晦聽蔡季通預卜壽藏門人裹糧行緋六日始至乃知好奇者固通人大儒之常患也

龍髓經一卷

疑龍經一卷

辨龍經一卷

龍髓別旨一卷

九星祖局圖一卷

五星龍祖一卷

二十八禽星圖一卷

陳氏曰以上七種皆無名氏并前諸家多吳炎錄以見遺江西有風水之學往往人皆道之

三十二家相書三卷

晁氏曰或集許負以下三十二家書成此編

月波洞中記一卷

晁氏曰序稱唐任道遙得之於太白山月波洞石壁上凡九篇相形術也崇文總目置之五行類

雜相書一卷

陳氏曰凡三十二種又有拾遺亦吳晦父所錄

成和子觀妙經一卷

陳氏曰不著名氏

希夷先生龜鑑一卷

陳氏曰逸人亳社陳搏圖南撰劉康國注館閣書目作人倫風鑒

袖中記一卷

晁氏曰皇朝李唐濬撰辨人形色知其壽夭吉凶

群書古鑒一卷

晁氏曰未詳撰者姓名熙寧間集晁氏相術驗者諸家相書五卷

陳氏曰知莆田縣昭武黃庚毅夫撰集

玉管神照一卷

陳氏曰無名氏

相馬經

晁氏曰伯樂撰

集馬相書一卷

晁氏曰光祿少卿孫珪撰

相牛經一卷

晁氏曰序曰審戚傳之百里奚漢世河西薛公得其書以相牛千百不失其一至魏世高堂生又傳晉宣帝其後秘

之細字薛公注也

相鶴經一卷

晁氏曰題曰浮丘公撰其傳云浮丘公傳於王子晉後崔
文子學道於子晉得其文藏十嵩山之石室淮南公採藥
得之乃傳於世

相貝經一卷

陳氏曰不知作者

師曠禽經一卷

陳氏曰稱張華注

右形法

文獻通考卷之二百二十

